

भाव पूजा

(आरधनायि सोम्बरन)



डॉ बनसी कौल 'बनसी'

Compliments from
Virender Kumar

भाव पूजा

(आराधनायि सोम्बरन)

G.M. College of Education
Raipur, Bantalab
Jammu.

Acc No. 3729 (D)

Dated 17-10-2022

डॉ. बनसी कौल 'बनसी'

(सॉरिय अधिकार छि मुस्सनिफ सुंदि नावु रँछरिथ)

किताबि हुं नाव	:	भाव पूजा
भक्ति कवि	:	बनसी कौल 'बनसी'
नज़रि सॉनी	:	पी० एन० कौल 'सॉयिल'
कम्प्यूटर कम्पोजिंग	:	साधना कौल
कम्प्यूटर डी० टी० पी	:	रिंकू कौल # 9419136369
छपन वरी	:	2017 ई०
म्वल	:	₹200.00 र्वपयि सिर्फ
पब्लीशर	:	पानु मुस्सनिफ

किताब कति मेलि :-

बनसी कौल 'बनसी'

फलेट नं० 802/A,

द्वारिकाधाम एपार्टमेंट, पुलाट नं० 13,

सेक्टर 23, नई दिल्ली – 110075

मोबाइल नं० : 09350995068

भाव पूजा

ॐ नमो भगवते गूपीनाथाये

अर्पन

पुनिस टॉठिस स्वर्गवॉसी पैत्रस
श्री भलबदर कौलस (बलु टॉठिस)
छुस बु यि किताब
अर्पन करान।

- 'बनसी'

आराधनायि व्यस्तार

अभ्यास छु प्वखतु बननुक साधन : पृथ्वीनाथ कौल 'सॉयिल'	7
येलि सु येछि : बनसी लाल कौल 'बनसी'	12

शुमार	आराधनायि	सफु
1.	अज्ञान मनुकुय कासतम	14
2.	अहम	16
3.	कर्म खुर	17
4.	अन्तु समय में मॅशराव	18
5.	मो खार पानस मटि पापु बोर	20
6.	पांछ चु पॅद्य	21
7.	अथु रोट	22
8.	ज़ारु पार	23
9.	हारुन ताफ	25
10.	भगवान बबु महाराजस ज़ॉरी	26
11.	जय साई राम! जय साई शाम!	27
12.	व्यन्ती	28
13.	चलु लार	30
14.	यारस छेनु म्यॉन्य माय	31
15.	जय मॉज शारिका!	33
16.	अदु लबख जानानो	35
17.	शिव मन्त्र परतो	36
18.	रोशि पोशि वरुन करय	38
19.	मोल मॉज भगवान च़े व्यंदुन छुय	39

भाव पूजा

20.	बबु भगवान छुख बखशनहार	41
21.	दून बैनिथ पान कोनु छुख दोनान	43
22.	विकारन मंज़ चुय ब्वड्योख	45
23.	चु छुख दाता	46
24.	ब्रह्मा छारुन	47
25.	अदु जीवु प्रावख म्वकलन पाय	49
26.	पूजा करय शिव शंकरय	51
27.	छुय प्रणाम बारम्बार	52
28.	संसार छुय भ्रम	53
29.	बबु भगवानु प्यठ दयाये रोज़	55
30.	व्यनथ	57
31.	तार दिम कठिने भवुसरु	59
32.	दमु दमु रोज़ सरखम	61
33.	कूठ मॅन्जिल	63
34.	सतुवरस करव ज़ारु पार	65
35.	अथुरोट कर	67
36.	जय जय कृष्ण मुराँरी	69
37.	चु पॅद्य	70
38.	ज्ञान गछि अदु ईशानस सुत्य	72
39.	चु पॅद्य	75
40.	सू तय हू	77
41.	श्रु राम अनिगटु करतम मे दूर	79
42.	गाशिलिस रूदुख अँछ मूरान	81
43.	लोलु नाद	83
44.	आमुत छु डेडि तल सवॉल्य	86

45.	वल्लो व्वन्य लोल आमो	88
46.	सथ ग्वरस ज़ार पारु	90
47.	टाठि ग्वरु दीवु	92
48.	टोठतम कृपालू	93
49.	हय क्याह गोम	94
50.	जय राम जय श्रीराम	95
51.	कोरुम नु ती यी ओसुम करुनुय	96
52.	वाख	98
53.	गीत सार	100
54.	चीर्य याद प्योम	101
55.	चु पख	102
56.	सम्सार	104
57.	मॉज सथ छम चॉनी	105
58.	लोल हॉय आम, वुनि नाय आमय	107
59.	परनावतम सू हम सू	109
60.	करूँ न जगत में बुरे काम	110
61.	मन डंजि थावुन	111
62.	बारम्बार करतस नमस्कार	113
63.	लोला बरय, लोला बरय	115
64.	यारु दोद	116
65.	ॐ नमः शिवाय	118
66.	चु पेंद्य	120
67.	दु पेंद्य	124
68.	चु पेंद्य	125

(ग्वडु कथ)

अभ्यास छु प्वखतु बननुक साधन

यथ पहलूदार ज़िन्दगी मंज छि वारयाह पहलू। अदु कांह ति पहलू ऑस्यतन तथ मंज प्वखतगी अननु बापथ छु अभ्यासय अख साधन। यिथय पॉठ्य लोय तीर अन्दाज़न तीलुक्रायि मंज वुछान वुछान प्यठुकनि नचुवनि गाडि अँछ तीर। यिथ्यन निशानन छु अभ्यासय ज़रूरथ। भँखती हुंद अभ्यास छु भँकितस मुक्ती दिवान। अभ्यास छु साधनायि स्वफल बनावान। अभ्यास किन्य छु साधक मनु मुराद प्रावान। विद्यार्थी ति छु अभ्यास कँर्य कँर्य बोड विद्वान बनान। अभ्यासी छु कन्यव मंजु लाल बदि कड़ान। अदु य्वहय अभ्यास बराबर थवान थवान वोत डा० बन्सीलाल कौल 'बन्सी' बँखती हुन्धन सनिरन तु भक्ति रस बास्योस त्यूत मोदुर ज़ि अँम्य लॉज बँखती हुँधन सथ व्यचारन साम हेन्य तु मनुकि नागरादु हेतिनस प्रेयिवुन्य तु रँसिल्य भाव वुजुन्य। अँम्य खॉर्य यिमय व्यचार शॉयरी हुँजि कहवचि तु रंगाब रँग्य व्यचारन मंज व्वतलोवुन शारुत। यिमय शोद्य तु श्रूच्य भाव छि अँहुँजन यिमन सॉदुरवार रच़नायन मंज टाकारु पॉठ्य लबनु यिवान। यथ नाशवान संसारस मंज क्याह छु पोज़ तु क्याह छु अपुज तमिचिय भावथ छि अँहुँद्य ताज़ु शार करान।

साधकन तु बँखुत्यन खॉतरु छि पनुन ज़न्म रथि खारुनक्य ग्रँज़ रँस्य इशारु मेलान। दयि स्मरण, तँम्यसुनज़ त्वता, तसुन्द दान, तसुंज पूजा, तसुन्द भजन कीर्तन तु बेयि तँहुँज स्मरण क्यथु पज़ि

भाव पूजा

करुन्य तु स्वक्रेयायि तु स्वकर्म करनुक श्वबु फल किथु छु प्रावुन
यिवान तु क्युथ आनन्द छु बखशान। यिम सॉरिय जॉविल्य न्वकतु छि
'बन्सी जियन' पूरु पॉठ्य व्यछुनॉव्यमुत्य। ग्वरु शेष परम्परा, रुत्य
संस्कार, मर्ययादायन हुंद रेंछरावुन, श्रूच अन्न तु सथ व्यचार, बेयि
सत्संगस छि यिम स्यठाह थज़र दिवान।

पानु अख डाक्टर ऑसिथ, दवा यलाजस सुत्य दैव शक्तियन
हुंद आदर करुन छु ओहंद बुनियॉदी मकसद। व्वपर तु दूर देशन मंज़
फीर्य फीर्य ति पनुन धर्म रेंछरुन तु तथ प्यठ पकुन छु 'बनसी जियुन'
थ्यकुन लायक ग्वण। कथ चेनुन्य कथि सनुन, तु कथ बावुन्य छु यिहुंद
रुत स्वभाव। "सतुच साधना" छे यिहुंज ग्वडनिच शारु सौम्बरन।
यथ परन वॉल्य बडु तॉरीफ छि करान। अँजिच यि व्यनँच तु आराधनायि
सौम्बरन गछि स्यठाह मकबूल ति छु अथ वुछिथ तु पॅरिथ पानय
बासान। "भाव पूजा" छु अथ मॉर्यमोन्द तु शूबवुन नाव।

यथ सौम्बरनि मंज़ छि यिमय पांचताँजी अलावय रच़नायि
शॉमिल। रच़नायि छि नाना प्रकॉर्य तु मोज़ूह किन्य अँकिस ख्वतु
अख। सनुवुनि तु रछि करनस लायक व्यचार तु भाव छिख
नज़मॉव्यमुत्य। किताबि छु शूबवुन अनुहार। कागज़ जान। प्रिटिंग
जान। म्वल स्यठाह वॉजिब। किताब वुछिथुय छु दिल व्वठ ज़न
कड़ान। परन वाल्यन यियि किताब पॅरिथुय पछ। बु ति रोज़नु अमिचव
रच़नायव मंज़ु कैह शार येत्यथ दर्ज करनु रोस :-

सथ ग्वरु मे सनम्वख बासतम।

अज्ञान मनुकुय मे कासतम।।



भाव पूजा

ॐ ॐ सौरिथुय अन्दरी शम।

शमु दमु ज़ेर चुय कर अहम।।



म्यानि सथ ग्वरो कर तु यॉरी।

कास खॉरी बॅखत्यन।।



यार येलि मेल्योव तस बालु यारस,

सिर्य म्वठ थपि निथ वॅन्ज़नस माय।

ख्वर अदु छेलिनय यारन यारस।।

क्याह करु यारस छेनु म्यॉन्य माय।।०।।



प्राणु खसु वसि मंज़ युस चुय स्मरान,

कहवचि प्यठ सु छु पासु स्वन नेरान।

सु छु यूगी प्राण छिनु लगान तस दरय।।

शेरि मुक्कटस च़ेय हय पॉर्य पॉर्य लगय।।०।।



ज़िंदु जुव मोल मॉज नेशिनावुन छुय,

दयस पतु तिहुंज़ पूज च़े करुन्य छय।

ही जीव योद स्वर्ग च़े प्रावुन छुय।।

मोल मॉज भगवान च़े व्यन्दुन छुय।।०।।



फलुवॉय मन म्योन छुय बे करार,

वातान अँतिय लार छुस अँतिय दार।

गर्जु ओन लोगुम तु गोम लुर पार ॥

गुल्य गँडिथ च़ेय छुसय करान ज़ारुपार ॥० ॥



शिवुनाव युस म्वखस विज़ि विज़ि खारे,

सुय भ्रम त्याँगिथ ब्रह्म छारे ।

यमु दारस तस कांह न साँ खारे ॥

सुय भ्रम त्याँगिथ ब्रह्म छारे ॥० ॥



सम्सारु सँदरस तार दिम हरी हरु,

तार दिम, तार दिम कठिने भवुसर ।

मन मोलुत छुम गोमुत कासतम थरुथरु ॥

तार दिम तार दिम कठिने भवुसरु ॥० ॥



दमु दमु रोज़ सरखम, मद मॉरिथ च़लिय भ्रम ।

छुय अँन्दरु तँमिसुय नम, मद मॉरिथ च़लिय भ्रम ॥



पनुन पान स्वरान स्वरान गोख बे हाल,

गृहस्तुक्क्य मोहन कोरनख कंगाल ।

मॉर्यफतु तार वँज़िथ च़लिय च़े मलाल ॥

स्व क्रैयायि करतु ज़ीवु प्रावख कमाल ॥० ॥



यिथय यिथय कँन्य छि यिहुँद्य शार तु रच़नायि बोड सबक
हेछिनावान तु धर्मु कथायन हुँद पय पताह दिवान । योदवय् अँहुँद्यन

शारन मंज ओरूजन तु शॉयरी लवॉज्यमातन हुंज कुनि कुनि व्यछय
 बासान ति छे अमापोज नव्यन, श्वद्यन तु धार्मिक व्यचारन हुन्द छुस
 स्वब्यख। बॅखती मंज मस्त शॉयरस छुन वजन कॉफियि या रिदीफ
 मस्ती मंज च्यतुसय रोजान। न छु सु अम्युक वायि बरान।

बहरहाल छु 'बनसी' दोहें ख्वतु दोहें बॅखती मार्गस प्यठ पॅकिथ
 जान भक्ति कवि बननुक व्वमेदवार तु बु करस ओही जि नॅविन तु
 फोलिन। मनु मुराद कॅरिनस म्योन बबु भगवान पूर।

जय भगवान जी!

रुत कांछन वोल
 पृथ्वीनाथ कौल 'सॉयिल'
 19-ए-लक्ष्मी विहार,
 जैन मार्ग, ककरोला मोड
 उत्तम नगर-दिल्ली-59



(पुनर्नय कथ)

येलि सु येछि

मे छु अथ कथि प्यठ पूरि पूर विश्वास तु पछ ज़ि मनशि सुंदिस
 अथस मंज छुन किंही ति। म्योन स्वर्गवांसी पिता जी ओस वनान ज़ि
 दयि सुंदि हुकमु वरॉय छुन पुन वेंथुर ति अलान। सोरुय छु तेली
 सपदान येलि सु येछि। अदु मेति वोत ल्वकुचारु पानु प्यठय अथ कथि
 रछि करान तु दोहें खत्तु दोहें अथ प्यठ पछ गनान। म्यॉन्य ग्वडनिच
 शारु सोम्बरन “सतुच साधना” येलि मे खूच्य खूची बाज़र केंड। तथ
 ति ओस तेंम्य सुन्दुय यछुन डखि। पतु येलि म्यान्यव हमदर्दव मे अथ
 प्यठ होसलु बडोव मे लेंज साज़स नवि नेंव ज़ीर तु नवि नोव सोज़
 व्वतल्योम मे हेच वारु पॉठ्य पुनिस सनातन धर्मस मुतलिक ज़ानकॉरी
 तु ज़ॉन्ययाँबी हॉसिल करनुच कूशिश करुन्य। पुनन्यन भक्ति कवियन
 हुंज रचनायि पलि पावुनि, धर्म कथायन वारु सनुन। मे लोब अति सु
 रस तु सु आनन्द युस नु म्यॉनिस खाबु खयालस मंज ति ओस। मे हेच
 अमिकि बरकतु नव्यन नव्यन व्यचारन शारु शकुल दिन्य। मे कोर यि
 सख ख्वश तु बु गोस अथ वति येछि पछि कदमाह कदुमाह दिवान।
 अथ दौरान यिम व्यचार मे मनि व्वपदेयि तु तिम कॅर्य मे यिकुवटु तु
 तिमय छि यथ “भाव पूजायि” मंज दर्ज।

दपान छिना मलस टुख मॅशीदि तान्य। अदु मे ति तुल्य तु गोस
 पुनिस मेत्रस श्री पृथ्वीनाथ कौल ‘सायिल’ साँबस निश तु त्रोवमस
 ब्रोंठुकनि। तिमव तुल यि म्योन मसवदु तु थोवुख शीरिथ। ‘सायिल’

सॉबन ऑस म्यॉन्य ग्वडनिच किताब ति शीरुमुच पुरमुच । ग्वडु कथ
 ति ऑस तिमुवय लीछिमुच । अज़ ति कॅरुम तिमनुय हवाल । 'सॉयिल'
 सॉब छि पॅज्य पॉठ्य प्रथ कॉन्सि तलब गारस अथु रोट करनुकि हकु ।
 अदु हसबि आदत कोर तिमव म्योन यि मसवदु ति किताबी सूरतस
 मंज़ तयार । तिहुंद शुक्रानु करनस कित्य छिनु मे लफुज़ुय । 'सॉयिल'
 सॉब छि प्रथ कॉन्सि वथ हावान । असि गछि यिहुंद शुहुल सायि वॉन्सन
 रोजुन ।

पनुनि गरवाजनि तु पनुन्यन शुर्यन हुंद हॅख्य हॅख्य ति छु यथ
 कामि डखस । तिमन ति छुस मनु किन्य ऑही करान ।

अमि अलावु छुस पनुन्यन रफीक दोस्तन हुंद ति शुक्रगुज़ार
 यिम म्यानि यिमु कामि वुछिथ मे लोल बरान छि ।

पनुनिस ल्वकटिस तु मॅछिलिस बॉयिस रिंकू कौल सुंद तु
 टाछि कोरि साधनाजी हुंद शुक्रिया करुन छुस ज़रूरी ज़ानान, यिमव
 यि किताब कमप्यूटरस प्यठ खॉरिथ शूबराँव ।

ऑखरस प्यठ छुस बु पनुन्यन परन वाल्यन दस्त बस्तु अज़
 करान यिथु कॅन्य म्यॉन्य ग्वडनिच किताब पॅरिथ तिमव पनुन्य तोसुरात
 मे सूज्य, तिथय पॉठ्य सोज़न यथ किताबि प्यठ ति पनुन्य राय । बु
 रोज़ु प्रारान ।

बनसी लाल कौल 'बनसी'



अज्ञान मनुकुय कासतम

जगत ग्वर भगवान जियस कुन व्यनथ ।

अज्ञान मनुकुय कासतम ।।

सथ ग्वरु मे सन्मुख बासतम, अज्ञान मनुकुय मे कासतम ।
डेडि तल बु आस कन थावतम, अज्ञान मनुकुय मे कासतम ।।

मनि मेय प्रकाश ग्वरु हावतम, पनुनुय मंदर अँत्य बनावतम ।
भाव पोशन क्राव करनावतम, अज्ञान मनुकुय मे कासतम ।।

दकु जद बु छुस डखि रोजतम, तुलिथुय मे थोद आसरु दितम ।
डलु यिनु बु ह्यसु फिरनावतम, अज्ञान मनुकुय मे कासतम ।।

छ्यन काम, क्रूधस, मोहस दितम, तृष्णायि लूबस ठोर दितम ।
ग्वरु स्मरणि ज्वन फिरनावतम, अज्ञान मनुकुय मे कासतम ।।

प्रथ क्षण मे च्यथ वुजुनावतम, सूहम सूहच लय दितम ।
सूहम स्वरान गाह प्रजलावतम, अज्ञान मनुकुय मे कासतम ।।

मनुची शोदी करनावतम, स्व क्रियायि हुन्दुय बाश दितम ।
क्वक्रियायि निशि लोब थावतम, अज्ञान मनुकुय मे कासतम ।।

भाव पूजा

शिवोहम स्वरुन पलि पावतम, ग्वरु पूज करान शौमरावतम ।
शमु दमु अहम मदु वालतम, अज्ञान मनुकुय मे कासतम ॥

क्व वासुनायि म्वकुलावतम, अनतः करण शौहलावतम ।
अँन्दरी अँन्दुर चुय बासतम, अज्ञान मनुकुय मे कासतम ॥

कर्म भूमिका शोलुनावतम, सूहम शब्दु सगुनावतम ।
सत् चित्त आनन्द मे बासतम, अज्ञान मनुकुय मे कासतम ॥

ग्वरु स्मरणि मंज मगन थावतम,
ॐ नमः शिवाय पुरनावतम ।
पँतिमि गरि 'बन्सीयस' याद थावतम ॥
अज्ञान मनुकुय मे कासतम ॥०॥



अहम

ॐ ॐ सौर्यथुय अँन्दरी शम, शमु दमु ज़ेर चुय कर अहम।
नतु छुम संसार भ्रमयं भ्रम, शमु दमु ज़ेर चुय कर अहम॥

ओमचे चेनुवनि चलुनय भ्रम, येलि जीवु चु करख रुत्य स्वकर्म।
क्व क्रियायन अदु करख क्रम, शमु दमु ज़ेर चुय कर अहम॥

ओमची माल फिर अँन्दरी नम, शिवोहमुक अदु वज़िय जीरु बम।
सोज़ि यँन्द्राज़ु गेवि हा बम बम, शमु दमु ज़ेर चुय कर अहम॥

दय ना छु ओर योर छुय चु बैल्य भ्रम, दय छुय च़ेय सुतिय हर दम।
ज़ांड गाल अँछिनय करतख नम, शमु दमु ज़ेर चुय कर अहम॥

स्वकर्मन बर बा लोल हरदम, स्वकर्मव ना डलि नावि नम।
यिनु साँ छिम्ब गछिय गछख बरहम, शमु दमु ज़ेर चुय कर अहम॥

गॉलिथ अहम बनख व्वतम,

अदु परख पानय शिवोहम।

‘बन्सी’ सतुचे वति कुन लम॥

शमु दमु ज़ेर चुय कर अहम॥०॥



कर्म खुर

ओन कति प्रजुनावि दुरि अनुवार, चन्दु छोन करिय क्याह कार।
 कर्म खुर करान छु लुरपार, चन्दु छोन करिय क्याह कार॥
 चंदस येलि आसिय नु हार, नावि हॉन्ज तारस करि इन्कार।
 सूद खार करिय नु लारु लार, चन्दु छोन करिय क्याह कार॥
 अर्दाह अध्यायि छि व्यछनान, कर्मय छु मनशि बलवान।
 कर्मय छु गीता सार, चन्दु छोन करिय क्याह कार॥
 छुय मॅन्जिल क्रूठ यकबार, च्वपॉरय लूटर छि बेशुमार।
 ब्रोमरान छि मनकुय करार, चन्दु छोन करिय क्याह कार॥
 वासनायि पनुनि जेर कर, दयि स्मरणि लोल बर।
 कैरयजि आत्म मनथनु व्यचार, चन्दु छोन करिय क्याह कार॥
 हा जीवु रोज़ खबरदार, कांह ना तुलि चोन गोबबार।
 व्यतरुन च़े पॉन्य पानु बार, चन्दु छोन करिय क्याह कार॥
 ग्रट अनवारि चु लोगमुत, कर्म, फल पनुनि द्रामुत।
 फल सोरि बेहे ग्रट खार, चन्दु छोन करिय क्याह कार॥
 कर चु त्युथ युथ लबख तार, स्व कर्म छु रुत तु फलदार।
 युन गछुन छु बडु दुशवार, चन्दु छोन करिय क्याह कार॥
 'बन्सी' चु च्यथ कर बेदार, क्षण क्षण रोज़ हुशियार।
 अहम दुनिथ मंग दयस तार, चन्दु छोन करिय क्याह कार॥



अन्त समय में मँशराव

अन्त समय क्याज़ि छुख मँशरान

दयि स्मरणि कोनु लोल बरान।

यि दिह्य छुय आँखरस नाशवान॥

दयि स्मरणि कोनु लोल बरान॥०॥

येलि बुजर पूरि पूर च़ेय व्यापान,

दगु दगु जवॉनी हुन्द छिम्ब छुय करान।

नरि ज़ंगु लोसान अथु व्यसरान॥

दयि स्मरणि कोनु लोल बरान॥०॥

पनुन्य करतूत येलि च़े च़्यतस प्यवान,

हॉरिथ आँखरस ह्यस छुय प्यवान।

तनु रूदुख क़ेंजल्यन पोन्थ सारान॥

दयि स्मरणि कोनु लोल बरान॥०॥

रंगु रंगु दौद्य तु व्यौज़ छय आवुरान,

यि शरीर छुय फुटान न्यर्बल बनान।

दकनुय लेंगिथ दयस मोत चुय मंगान॥

दयि स्मरणि कोनु लोल बरान॥०॥

नेबरय अंदर कोनु छुख चु अचान,

कोनु छुख ठोकरस नमानं तु पूजान।

नमन केंरिथ कोनु छुख ज़िंदय मरान॥

दयि स्मरणि कोनु लोल बरान॥०॥

मनु मंदरस येलि सु वास छु करान,
 गाशिचि प्रवु अदु च्वपॉर्य प्रज़लान ।
 साधक तँथ्य हबा छिय नमन करान ॥
 दयि स्मरणि कोनु लोल बरान ॥० ॥
 मतु रोज़तु ज़ॉव्यजार ऑत्य छांडान,
 सेद्य पॉठ्य सैज़ि वति रोज़सॉ पकान ।
 अदय क्रूठ मँज़िल लबुन छु आसान ॥
 दयि स्मरणि कोनु लोल बरान ॥० ॥
 श्वद आहार, श्वद अन्न जीवु रोज़ करान,
 तवु अन्तः करण श्वद छि सपदान ।
 श्वज़रय करनावि तार छु लबान ॥
 दयि स्मरणि कोनु लोल बरान ॥० ॥
 छांयन पतु पतु कवु चु दोरान,
 अति ना हॉसिल छु कैह ति यिवान ।
 कनि प्यठ पोन्थ वन छा ठँहरान ॥
 दयि स्मरणि कोनु लोल बरान ॥० ॥
 यमु फॉन्स्य जीवु येमि गरि छे लगान,
 तमि विज़ि कांह ना सहायता करान ।
 ॐ नमः शिवाय बेयि ग्वरु छु तार दिवान ॥
 दयि स्मरणि कोनु लोल बरान ॥० ॥
 क्व क्रेयायन जीवु लार रोज़ करान,
 स्व कृतुक प्वन्युक फल छुनु रावान ।
 'बनसी' छु पानस यिय व्वपदीश दिवान ॥
 दयि स्मरणि कोनु लोल बरान ॥० ॥

कर्म

मो खार पानस मटि पापु बोर

रूतिवुय कर्मव तरख अपोर, मो खार पानस मटि पापु बोर।
 कर व्यचार रोजतो सतुसुय लोर, मो खार पानस मटि पापु बोर॥
 कर्म छुय चेनुवन मोकर शोर, करतो ग्वरु शब्दस चृय गोर।
 अँथ्य सँन्यथुय हा ज़ेनख चु दोर, मो खार पानस मटि पापु बोर॥
 काँसि ना यि संसार द्राव ज़ांह सोर, आँस्यतन राज़ु या आँस्यतन बिचोर।
 स्वनु लंकायि रूद्य नु काहशथ पोर, मो खार पानस मटि पापु बोर॥
 'बुय' शब्द बनावान च़ेय कमज़ोर, पापस कुन छिय च़े पकान खोर।
 दयि स्मरणि हा फेरख चु योर, मो खार पानस मटि पापु बोर॥
 शब्री दय मनु अँन्दरिय गोर, अहंकारु भावु किन्य लँक्ष्मनन ति होर।
 नागु फांसि सुत्य गव सुय अडमोर, मो खार पानस मटि पापु बोर॥
 हावु बावु सुत्य ज़ीवु वातख चु कोर, मो थाव अँथ्य सुती रवा दोर।
 द्यानु यारु बलु च़लिय मलु बोर, मो खार पानस मटि पापु बोर॥
 मोहकी ज़ामु येति यिमुवय पुरय, रचि रचि तिमुवय सॉर्य तीर हूर्य।
 यिरु गछि पानय वाति कति कोर, मो खार पानस मटि पापु बोर॥
 समुयन काँन्सिय थँव्यमा ज़ोर, कर्मव पनुन्यव वलनु आव बिचोर।
 कालुनि छटि दकुनोव कति कोर, मो खार पानस मटि पापु बोर॥
 श्वज़र प्राँविथ दुन पापु बोर, दयि सुन्जि स्मरणि रोज़साँ लोर।

‘बनसियो’ पज़रु सुत्य काँन्सि ना होर॥

मो खार पानस मटि पापु बोर॥०॥

पांछ चु पँद्य

शिव छुय थलि थलि हा जीव आसुवुन।

शांत स्मरण वँरिथ हेयिय बासुन।

शिव छुय हा जीव अँन्दरी चेनुन।

शिव साधनायि किन्य दियी दर्शुन॥

शिव तु सूहम येलि जेरि जेरि स्वर खो।

शिव लोलु सोदरस डुंग चू दिखो।

शिव छुय प्रकाश चवापोर डेंशिखो।

शिवुय छुय आदि तय अन्त मूर्खो॥

शिव नावुच माल नॉल्य त्रावख।

अदु जीव प्रावख म्वकलन पाय।

शिव छुय सोरुय अहम येलि त्रावख।

अदु मालि चलियो मनि च़ेय छाय॥

योत यिथ जन्मस जीवु क्याह प्रोवुथ।

मन ब्रोमुरोवुथ तु मोह प्रोवुथ।

छायन पतु पतु मन दोरु नोवुथ।

पासु रावुरोवुथ खाम प्रोवुथ॥

पनुन पान वेषयन हुन्द ग्वलाम बनोवुथ।

पान काम, क्रूध, मोहँ ज़ालु फँसरोवुथ।

अँथ्य ज़ालस तन मन हुर नोवुथ।

येहँ लूक तु परिलूक रावुरोवुथ॥

अथुरोट

मॉजी ललाटस अथु डालतम

क्षमाश्वरी क्षमा चु करतम, मॉजी ललाटस अथु डालतम ।
 पनुने अथु कर्मन खुर कासतम, मॉजी ललाटस अथु डालतम ॥
 दयि सुंजि स्मरणि मंज मगन थावतम, मनु सुय शोदी करुनावतम ।
 हरि ॐ हरि ॐ स्वरुनावतम, मॉजी ललाटस अथु डालतम ॥
 कहवचि खौरिथ पासु बनावतम, सरतल छुस तु स्वन बनावतम ।
 सतुचे रुचि वति वति पकृनावतम, मॉजी ललाटस अथु डालतम ॥
 'बु' तु 'बुय' शब्दुय मॅशरावनावतम, जय माता की पुरुनावतम ।
 मनु मंदोरि मंज आसन थावतम, मॉजी ललाटस अथु डालतम ॥
 लूभ तय मद मोह अहंकार कासतम, वासना म्योनी श्वद करतम ।
 शक्ती चुय छख बॅखुत्या बनावतम, मॉजी ललाटस अथु डालतम ॥
 स्यदु पीठु प्यठय नज़राह त्रावतम, दारनायि द्यानाह दारुनावतम ।
 मन म्योन स्वकर्म न्यथ करुनावतम, मॉजी ललाटस अथु डालतम ॥
 ओमची स्मरण येछि फिरुनावतम, मनु सूहम सू पुरुनावतम ।
 अज्ञानु नेन्दरे मंजु वुजनावतम, मॉजी ललाटस अथु डालतम ॥
 मोहें ज़ालु वलनु आस व्वन्य मुछिरावतम, लान्युन न्याय मेय अँजरावतम ।
 चन्यचल मन म्योन थ्यर बनावतम, मॉजी ललाटस अथु डालतम ॥
 ज्ञानु अमर्यथ मेय दामु दामु चावतम, मोह गटु कासतम पोज़ द्रेंठुनावतम ।
 ज्ञानु प्रकाशि औंद पोख प्रज़लावतम, मॉजी ललाटस अथु डालतम ॥
 बरु छुस गोमुत नवि फोलुरावतम, मॉज व्यकारव निशि रौछ करतम ।
 लोलुच 'बन्सी' पछि वायिनावतम, मॉजी ललाटस अथु डालतम ॥

ज़ार पार

चौन्य आराधना छय नु मेय तगान

क्याह करु मौज भवौन्य छुसय अन्जान,

चौन्य आराधना छयनु मेय तगान।

मोहौं गर्दि कोरमुत छुम मोलुत मे पान॥

चौन्य आराधना छयनु मेय तगान॥०॥

विजि विजि पान पनुन गोस मँशरावान,

संसौर्य जंजालन रूदुस सज़ान।

अमि मंजु कांह नय छुम न्यबर कड़ान॥

चौन्य आराधना छयनु मेय तगान॥०॥

त्रेशनायि खौस्य गोस बैर्य बैर्य चवान,

अमिकुय खुमार गोम जेरि जेरि खसान।

अँम्य खुमारन कोर मे परछ्योन पान॥

चौन्य आराधना छयनु मेय तगान॥०॥

ल्वकचार सौर्योम गिंदान गिंदान,

जवौनी जोशि किन्य रूदुस मस्त बु गछान।

क्वकर्मव बुजरस कोरहस पशेमान॥

चौन्य आराधना छयनु मेय तगान॥०॥

मौज संतानन छख चु रक्षा करान,

जान औस्यतन तिम या रो गरदान।

माजि हुंद कर्तव्य छख चुय पालान॥

चौन्य आराधना छयनु मेय तगान॥०॥

यस चॉन्य नज़र आसि सुनय ज़ांह भ्रमान,
 चानि वति पॅक्य पॅक्य सुनय ज़ांह थकान।
 सम्सॉर्य दोरि मंज़ सु ब्रोन्ठ नेरान॥
 चॉन्य आराधना छयनु मेय तगान॥०॥

माता सुहस प्यठ छख चु फेरान,
 राक्षसन तु द्वष्टन सम्हार चु करान।
 धर्मच जूत्य छखय प्रज़लावान॥
 चॉन्य आराधना छयनु मेय तगान॥०॥

यि सम्सार कोताह मस मौदुर लगान,
 सम्सॉर्य स्वखन पतु छु दोरुनावान।
 यि छुय हॉज बावुन छुन यि पोशान॥
 चॉन्य आराधना छयनु मेय तगान॥०॥

पज़ि मनु युस छु मॉज च़ेय कुन पकान,
 तस छख सातु सातु करान कल्यान।
 ज़िन्दु पानु पानस सु बाह छु करान॥
 चॉन्य आराधना छयनु मेय तगान॥०॥

छुस पथर प्योमुत ना पुरसान,
 चानिय कृपायि हुन्द मंगान वरदान।
 'बन्सी' हच़रलद छु बॅखती यछान॥
 चॉन्य आराधना छयनु मेय तगान॥०॥



हारुन ताफ

हारु तापन ज़ॉज मे तन

शीनु मॉन्य गॅजिस हन हन,	हारु तापन ज़ॉज मे तन ।
शिवु नावस लाग मन,	हारु तापन ज़ॉज मे तन ॥
शिवु नाव छुय बौड धन,	अम्युक पुजॉर्य जीवु बन ।
अदु पाप तु शाफ म्वकलन,	हारु तापन ज़ॉज मे तन ॥
वैषियि बरिमचु छे चंदन,	वैषियि सगुवान विकारन ।
वैषियि निवान करार ज़ीवन,	हारु तापन ज़ॉज मे तन ॥
शिवु शिवय अँन्दुरु खन,	अदय लागि वैषियन छ्यन ।
श्वद गछन अनतःकरण,	हारु तापन ज़ॉज मे तन ॥
शांत स्मरणि लाग मन,	शिव स्वरुन राथ तय द्यन ।
करनावि तार अदु बनन,	हारु तापन ज़ॉज मे तन ॥
काम, कूध, बेयि अँम्य मुहन,	त्रेशनायि तय लूभन ।
रूद करान ख्वखुर मे हनहन,	हारु तापन ज़ॉज मे तन ॥
अँन्दुरु रोज़ शिव चु छारन,	मुक्ती हुंद युस छु कारण ।
क्याह करु वंदु बहारन,	हारु तापन ज़ॉज मे तन ॥
‘बन्सी’ लोर रोज़ स्व कर्मन,	शिवु नावस पान रोज़ वंदन ।
अदु हा आवलुनि छि म्वकलन,	हारु तापन ज़ॉज मे तन ॥



भगवान बबु महाराजस ज़ॉरी

कास खॉरी बँखुत्यन

म्यानि सत् ग्वरो करतु यॉरी,	कास खॉरी बँखुत्यन।
त्राव बरन्यन यलु तॉरी,	कास खॉरी बँखुत्यन॥
आयि ज़न्मस अँस्य सॉरी,	सारिवुय ललु नोवहस।
हॉवुख पनुन्य रिशतुदॉरी।,	कास खॉरी बँखुत्यन॥
गोस जवान द्रास राहदॉरी,	सोन व्वगुन गोस मँशरान।
करँ मे क्वसंगन वुजॉरी,	कास खॉरी बँखुत्यन॥
थँकिथ छेनिथ पकान बाज़ॉरी,	त्रेशनायि वानन खसान।
कँरुम खुलु डुलु खरीदॉरी,	कास खॉरी बँखुत्यन॥
मन मे फलवॉय छुस वुबॉली,	छुनु रोज़ान यि डंजी।
कर मे सेज़ नजर चु व्वपकॉरी,	कास खॉरी बँखुत्यन॥
ठोगस मूहन मदु अहंकॉरी,	पासु क्योहो खाम गोस सोम्बरान।
रॉव असलुच मे ज़ानकॉरी,	कास खॉरी बँखुत्यन॥
करतु अनुग्रह मे हितुकॉरी,	युथ मे मनि हाय च़ल्यम।
बलन दॉद्य लदस दॉद्य सॉरी,	कास खॉरी बँखुत्यन॥
गाश ऑसिथ अँन्य अँस्य सॉरी,	फकत अनिगटु द्रुंढ्य गछ़ान।
मनि गटु कास वुछेथ च़वपॉरी,	कास खॉरी बँखुत्यन॥
‘बनसी’ करान बबु चे ज़ॉरी,	करतु सेज़ नज़र सारिनय।
युथ बनन सतुक्य पुज़ॉरी,	कास खॉरी बँखुत्यन॥



जय साई राम ! जय साई शाम !!

साई राम जपो हर आन,	जय साई राम ! जय साई शाम !!
साई बनाये बिगडे काम,	जय साई राम ! जय साई शाम !!
साई रखते हैं भक्तों का ध्यान,	जो ढूँडे उनको हर आन।
साई नाम ही हैं सत्नाम,	जय साई राम ! जय साई शाम !!
बंदे कर साई गुण गान,	दो अपने विषयों को लगाम।
करते कर्म रहो निष्काम,	जय साई राम ! जय साई शाम !!
ज्योति स्वरूप अंदर विराजमान,	करो आरती उसकी सुबह शाम।
गर सम्झोगे मिलेंगे राम,	जय साई राम ! जय साई शाम !!
इक ओंकार का करे जो ध्यान,	काम, क्रोध, मोह को देगा विराम।
बोये जो गेंहू काटे न धान,	जय साई राम ! जय साई शाम !!
असत्य् बंदे है मीठा जाम,	पीना है, पी सत्य् का जाम।
सत्य बंदे है, राम और शाम,	जय साई राम ! जय साई शाम !!
कर्मों का फल अटल अन्जान,	हुए दरिद्र या धनवान।
दिया केशव ने अर्जुन को ज्ञान,	जय साई राम ! जय साई शाम !!
जाग ले जाग तू इन्सान,	सिर्फ पांच तत्वों की तुझे पहचान।
अपने को आत्मा भी जान,	जय साई राम ! जय साई शाम !!
साई का 'बनसी' जप ले नाम,	आस्था सबूरी का शुभ अंजाम।
हासिल करना हैं गर मोक्ष धाम,	जय साई राम ! जय साई शाम !!



व्यन्ती

नाव बौठ लाग छुसय व्यन्ती करान

तार दिम सोदरस मंज छुस यीरान,
 नाव बौठ लाग छुसय व्यन्ती करान।
 दयि नाव म्वखस खार मे छुस बु अन्जान॥
 नाव बौठ लाग छुसय व्यन्ती करान॥०॥

कलि नुय बोल बोश चु करनावान,
 बॅखत्यून दयि लोल अँन्दर वुजुवान।
 लंगिनय पर्वतस अपोर तारान॥
 नाव बौठ लाग छुसय व्यन्ती करान॥०॥

कर्मुक फसुल छुख चु लोननावान,
 अहंकार वीरन छु पथरि पावान।
 साधकन दारनायि ध्यान दारनावान॥
 नाव बौठ लाग छुसय व्यन्ती करान॥०॥

अँड्य येति लूभस ख्यूबस मंज ब्वडान,
 अँड्य येति त्रेशनायि लोलु सगदिवान।
 कँह छि दयस सोरुय पनुन पुशरावान॥
 नाव बौठ लाग छुसय व्यन्ती करान॥०॥

ओंकार युस ल्वलि मंज छु ललुनावान,

संसार दोरि मंज ब्रोंठ सु नेरान ।

शिवोहमुक ज़फ करुन बैयन हैछिनावान ॥

नाव बोठ लाग छुसय व्यन्ती करान ॥० ॥

धनु-द्वार सम्पदा येत्य सोरुय त्रावान,

यि ज़ॉनिथ ति छुख ओन चु लागान ।

छुख मरुन मॅशरिथ क्वमव क्वमव चु सोम्बरान ॥

नाव बोठ लाग छुसय व्यन्ती करान ॥० ॥

अपज़िचि मंदोरि बजि बजि बनावान,

विकारन हुंज येक्ल यिमन चु खारान ।

कामु, क्रूध, मोहँ सुत्य छुहख सजावान ॥

नाव बोठ लाग छुसय व्यन्ती करान ॥० ॥

स्यज़र तय पज़र युस छु वरतावान,

तँस्य छुय आशितोश अनुग्रैह करान ।

‘बनसी’ कोनु अँन्दरिमिस छु मनुनावान ॥

नाव बोठ लाग छुसय व्यन्ती करान ॥० ॥



चल लार

पतु ब्रोंठ छय च़े चल लार

मोहें नेन्द्रे गछु बेदार, पतु ब्रोंठ छय च़े चल लार ।
 ज़ांड अँछिनय गाल त्राव अँशदार, पतु ब्रोंठ छय च़े चल लार ॥
 गुरु गुरु सौरय सौरय बन्योख बदकार, क्वकर्म ज़ीवो कस दिवान तार ।
 त्राव क्व क्रेयायि कर पनुन सुधार, पतु ब्रोंठ छय च़े चल लार ॥
 'बुय' वनुन छुय वुहान अँन्दरीनार, बुय हा बुय वनुन गछान वथवार ।
 बुय त्राव बन ओमुकुय परस्तार, पतु ब्रोंठ छय च़े चल लार ॥
 अँन्दरिमिस मंदरस मुच़रुथ नु दार, नय कोरुथ च़ेय कॉन्सि व्वपकार ।
 सोम्बरॉव्य सोम्बरॉव्य बन्योख शहमार, पतु ब्रोंठ छय च़े चल लार ॥
 कायायि पंजरस मंज़ चु जानावार, रंगु रंगु छुख करुनावान कार ।
 वुज़ुनाव च़्यथ अदु बनियो तार, पतु ब्रोंठ छय च़े चल लार ॥
 मनु बुलबुल ख्यावुन स्व अहार, युथ रोज़ि डंजि गेवि लोलुच तार ।
 जायि जायि अदु वुछिहन कर्तार, पतु ब्रोंठ छय च़े चल लार ॥
 शिवु शिवय ज़फ़ साँ बारम्बार, अष्टु दलु हृदय बनिय गाश दार ।
 युन तु गछुन म्वकलिय यकबार, पतु ब्रोंठ छय च़े चल लार ॥
 'बनसियो' विज़ि विज़ि अँन्दरय गार, अँत्य छुय आशि तोश दियिय व्यस्तार ।
 कर नमन ग्वर बनिय वँसीलुदार, पतु ब्रोंठ छय च़े चल लार ॥



यारस छेनु म्यॉन्य माय

वथुवार कोरमय यथ ल्वकुचारस,
क्याह करु यारस छेनु म्यॉन्य माय।
द्वह गॉम सूरिथ दिचम नरि नारस॥

क्याह करु यारस छेनु म्यॉन्य माय॥०॥

जवॉनी जोशि मेल्योस अहंकारस,
बुय बॅनिथ 'बुय' सुय ह्यवान गोस दाय।
बुय फोरुम अँन्दरु तय निथ गोम करारस॥

क्याह करु यारस छेनु म्यॉन्य माय॥०॥

अहंकारु वथ डॅजिम मंज बाज़ारस,
नब ओस साफ बासेयि ओब्र छा़य।
गटु ज़ोल गव लोगुस छांडुनि कहारस॥

क्याह करु यारस छेनु म्यॉन्य माय॥०॥

यिमु पॅक्य सेज़ि वति यथ सम्सारस,
वॉत्य मॅन्ज़िलस यिमन ऑस तसुंज माय।
दयि नावु फेरान हर्दस बहारस॥

क्याह करु यारस छेनु म्यॉन्य माय॥०॥

विजि विजि युस जपान छुय ओमकारस,

मनि तस बेशक नेरान छे ग्राय ।

सुय पकान ब्रोंठ छुय मंज गटुकारस ॥

क्याह करु यारस छेनु मयॉन्य माय ॥० ॥

यार येलि मेल्यव तस बालु यारस,

सिर्य म्वठ थपिनिथ वॅन्ज़नस माय ।

ख्वर अदु छेलिनय यारन यारस ॥

क्याह करु यारस छेनु मयॉन्य माय ॥० ॥

स्व दोखी 'सुशीला' ऑस मंज द्वालाबस,

क्याह दिमु शुर्यनुय छुमनु कांह व्वापाय ।

मनु किन्य नाद द्युतुन तारन हारस ॥

क्याह करु यारस छेनु मयॉन्य माय ॥० ॥

मतु ह्यतु वसुवास नम चु कर्तारस,

अदु च़ेय मेलिय रुच़रुक दाय ।

वारु वारु पापु शीन गलि मंज बहारस ॥

क्याह करु यारस छेनु मयॉन्य माय ॥० ॥

ही तु मादल व्यनु पोश तुल बॉरस,

बॅर्गु बॅर्गु च़ॉरिथ लाग यारस ।

'बनसियि' लोलु ओश छ्यतु करि नारस ॥

क्याह करु यारस छेनु मयॉन्य माय ॥० ॥



भाव पूजा

जय माँज शारिका

नूर बुधिसुय माँजॉय बु पॉर्य लगय,
शेरि मुक्कटस च़े हय पॉर्य पॉर्य लगय।
भावनायि पोश लागय च़ॉर्य च़ॉर्य लगय॥
शेरि मुक्कटस च़े हय पॉर्य पॉर्य लगय॥०॥

यि हय मन म्योन विज़ि विज़ि व्वतलान ब्वडान,
यि छु जानावार वुफि लंजि लंजि फेरान।
थ्यर थावतन, कर दया करार लबय॥
शेरि मुक्कटस च़े हय पॉर्य पॉर्य लगय॥०॥

छुस हय पॉपी नेशबोद बेयि अन्ज़ान,
वह्य अफसूस क्व क्रेयायि फीर्य फीर्य करान।
दिम पनुन्य ज्ञान युथ बु प्रायशचित करय॥
शेरि मुक्कटस च़े हय पॉर्य पॉर्य लगय॥०॥

मोहें ज़ाल रूद अँन्ध अँन्ध नाल मे वलान,
त्रेशनायि सरफ गॉम च्वापॉर्य बुछान।
दुष्कर्मव रसु रसु कोरहस बरय॥
शेरि मुक्कटस च़े हय पॉर्य पॉर्य लगय॥०॥

शायि शायि चॉन्य बैखुत्य चैय छिय छारान,

यिम वॉत्य चै निश रूद्य तिम मुराद प्रावान।

अथु डालुम ड्यकस चॉन्य शलूक परय।।

शेरि मुक्कटस चै हय पॉर्य पॉर्य लगय।।०।।

प्राण खसवसि मंज युस चुय स्मरान,

कहवचि प्यठ सु छु पासु स्वन नेरान।

सु छु यूगी प्राण छिनु लगान तस दरय।।

शेरि मुक्कटस चै हय पॉर्य पॉर्य लगय।।०।।

चक्रेश्वर छु प्रथ विजि शोलु मारान,

बैखुत्यन मॉज लान्यन श्रुक्य छख कडान।

दासु भावु आस कासतम अरसरय।।

शेरि मुक्कटस चै हय पॉर्य पॉर्य लगय।।०।।

अरु आमुत गोस चैय निशि दूरान,

छुसय पॉपी रूदुस नु ध्यान दारान।

चानि स्मरणि 'बनसी' युथनय डलय।।

शेरि मुक्कटस चै हय पॉर्य पॉर्य लगय।।०।।



अदु लबख जानानो

शिवु शिवय करतु पानो,	अदु लबख जानानो ।
शिवु स्मरणि बरख थानो,	अदु लबख जानानो ॥
नित्य नेमु यैलि करख दानो,	बनख अदु ग्वणुवानो ।
फुटुनय अदु मोहँ बानो,	अदु लबख जानानो ॥
पॉन्य पानस ह्यतु सामो,	कर कर्म निष्कामो ।
वुछख अंदरय श्रु रामो,	अदु लबख जानानो ॥
लूकु निन्द्या करुन्य नु जानो,	हॉसिल नु कैह यिवानो ।
क्याजि कर्मन चु खुर अनानो,	अदु लबख जानानो ॥
यि शरीर मनशि नाशवानो,	गछतु यिय चु मानानो ।
कॉल्य दैजिथ अथ सूर गछानो,	अदु लबख जानानो ॥
यिय ललाटस छु आसानो,	तिय मनुष्य बूगानो ।
अथ नु कैह ति बदलानो,	अदु लबख जानानो ॥
दयस रोज पान पुशरानो,	यि कीशव व्वपदीश दिवानो ।
करनावि सुय तार दिवानो,	अदु लबख जानानो ॥
मँ रोज चोन म्योन करानो,	यि छु जीवस मँशरानो ।
कर्म बोड छु बलवानो,	अदु लबख जानानो ॥
‘बनसियो’ गछु सनानो,	कर पनुन्य पानु ज्ञानो ।
ज्ञान पनुनी छे बोड ज्ञानो,	अदु लबख जानानो ॥



शिव मन्त्र परतो

शिवु शिवय स्वरतो,
पाप तय शाप हरतो,

य्वहय मन्त्र परतो ।
य्वहय मन्त्र परतो ॥

दान तय धर्म करतो,
भवु सरु सुय तरतो,

पनुनुय पान स्वरतो ।
य्वहय मन्त्र परतो ॥

अँन्दरय जीव छारतो,
आसन श्रद्धायि शेरता ।

बावु तस नाद लाय तो ।
य्वहय मन्त्र परतो ॥

क्व क्रेयायि मनशि त्यागतो,
गीता सारस चु सनतो,

स्वकर्म येति प्रावतो ।
य्वहय मन्त्र परतो ॥

दीनन दया करतो,
पोशा ह्युव मतु मरतो,

रूगियन दवाह करतो ।
य्वहय मन्त्र परतो ॥

नित्य नेमु द्यान दरतो,
साधानायि लोल बरतो,

आलुस दुनिथ त्रावतो ।
य्वहय मन्त्र परतो ॥

एकांतस मंज रोजतो,
क्याह करनि योर आस बो,

तति चु व्यचार करतो ।
य्वहय मन्त्र परतो ॥

मुदय गॅन्डिथ अँन्दुर वुछतो, मनु दारि तोर मुचरतो ।
अँत्य छुय नमन करतो, ख्वहय मन्त्र परतो ॥

लोलु नाद शिवस लाय तो, बावनायि ज़ूल ज़ालतो ।
'शिवोहमुक अलख बजावतो, ख्वहय मन्त्र परतो ॥

पानस साम चु ह्यतो, साम ह्यथ अँन्दुर्य म्वचतो ।
सत् चित्त आनन्द प्रावतो, ख्वहय मन्त्र परतो ॥

लोलु ओमसुय चु नमतो, शिवोहमुक सोज़ बोज़तो ।
सूहम 'बनसियि' वायतो ॥
ख्वहय मन्त्र परतो ॥



रोशि पोशि वर्शुन करय

सालु यितु साँ जटादरय,
 मनि अँन्दरु द्यानाह दरय,
 ज़ायि गोमुत ज़न्म म्योन,
 परु छ्योन कौरनस बरय,
 सातु सातु कोर मे म्योन म्योन,
 चानि स्मरणि भव तरय,
 कर्म हीनन खुर्य चु कासुवोन,
 साधुकन छुख कडान शरय,
 युस चे छारि तस चु मेलुवोन,
 रुमव रुमव शिवु शिवु परय,
 त्रे नेथुर छुख चु दारुवोन,
 अकि नज़रि चलि ज़रु ज़रय,
 हॉरिथ प्योमुत छुस बु थकुवुन,
 वावस बु गेजि गंडानय,
 नज़रि चानि चलि मे ग्रुहुन,
 व्वलुसय तमि खुमारय,
 होल गॅन्डिथ शिव बु छारुवुन,
 अदु चेनि 'बनसी' सथ ग्वरय,

रोशि पोशि वर्शुन करय।
 रोशि पोशि वर्शुन करय॥
 क्व क्रेयायि लोगुम व्यसुतोन।
 रोशि पोशि वर्शुन करय॥
 अफसूस यिय नु चेन्योम।
 रोशि पोशि वर्शुन करय॥
 धर्मु हीनन लय बरुवोन।
 रोशि पोशि वर्शुन करय॥
 पतु नु रोज़ान चु तस ब्योन।
 रोशि पोशि वर्शुन करय॥
 बँदी, अधर्म चु गालुवोन।
 रोशि पोशि वर्शुन करय॥
 पापु बोर नॅख्य बु सारुवुन।
 रोशि पोशि वर्शुन करय॥०॥
 ज़ुचि प्रेवि चानि नेरु नोन।
 रोशि पोशि वर्शुन करय॥
 द्यानु प्रकाशि अँन्दरु गारुवुन।
 रोशि पोशि वर्शुन करय॥



मोल माँज भगवान चें व्यंदुन छुय

जिन्दु जुव मोल माँज नेशिनावुन छुय,
दयस पतु तिहुंज पूज चें करुन्य छय।
ही जीवु योद स्वर्ग चें प्रावुन छुय॥
मोल माँज भगवान चें व्यंदुन छुय॥०॥



मोल माँज चें ल्वकटि प्यठु गथ करान छिय,
गलि गलि द्वदु प्यालु चावान छिय।
पनुन्य ब्वछि माँरिथ चें ख्यावान छिय॥
पतु ब्रोंठ छायेन चेंय वुछान छिय॥०॥



केंह वुछिम माँलिस माजि दकु ज़द करान,
केंह तिमन सोरुय छि अर्पण करान।
केंह वुछिम जिंदु पानु तिमन ललवान॥
केंह वुछिम तिमुनय मँशरावान॥०॥



राम जुव मनशि रूपु ओसुय भगवान,
दशरथस तु कोशल्यायि द्युतुन थोद मान।
आज्ञा माँनिथ वनुवास दोरुन॥
राजुसी तु ऐश्वरी दकु तँम्य द्युतुन॥०॥





जिंदु पानु मॅशरिथ द्वख दिवान तिमनुय,
मॅरिथ मरतब छुख खारान चु तिमनुय।
प्यंडुनुय टेक्य करान यश चु हावानुय॥
जिंदु पानुचि वदलि ल्योब थावान चुय॥०॥



तजरुबु वाल्यन हुंद दोप मनि थवान आस,
जिंदु दिमय नु सूर सास मॅरिथ वलय अँतलास।
जन्म दाता जन्म दात्री मोल तु मॉज चॉन्य॥
तिहुनघन पघन तल छु स्वर्ग मेलान॥०॥



‘बनसियो’ ज़ारु पार करतो तिमनुय,
यिमव बुडु मोल मॉज ब्योन कॅडिथ छुनुय।
यिछ वदल ब्रोंठ कुन असिति गॅछ नु गछुनिय॥
कर व्यचार तिथ संतान क्यथु फबुनुय॥०॥



बबु भगवान् छुख बखशनहार

बबु भगवान् छुख चु बखशनहार,
गुल्य गॅन्डिथ च़ेय छुसय करान ज़ारु पार ।
पूजायि चानि हुन्द गोछ मे गाटुजार ॥
गुल्य गॅन्डिथ च़ेय छुसय करान ज़ारु पार ॥० ॥

अन्ज़ान द्रामुत मंज़ बाज़ार,
प्रथ अंद लूटर ज़ागि बेशुमार ।
छिम्ब हय गछि छिम मे करान वथुवार ॥
गुल्य गॅन्डिथ च़ेय छुसय करान ज़ारु पार ॥० ॥

क्व वासनायि किन्य बबु बन्योस बेमार,
काम, क्रूध, लूभन गौंड मे अँन्दरु नार ।
कर दया दृष्टी बन्यम मे शेहजार ॥
गुल्य गॅन्डिथ च़ेय छुसय करान ज़ारु पार ॥० ॥

फलवाँय मन म्योन छुय बेकरार,
वातान अँतिय लार छुम अँतिय दार ।
गर्ज़ ओन लोगुम तु गोम लुर पार ॥
गुल्य गॅन्डिथ च़ेय छुसय करान ज़ारु पार ॥० ॥

मोहँ नेन्द्रि प्योमुत छुसय लाचार,
 क्वकर्म, क्वक्रेयायि छुय म्योन कार।
 यि ज्ञॉनिथ ति छुस करान पाप बिसियार॥
 गुल्य गॅन्डिथ च़ेय छुसय करान ज़ारु पार॥०॥

यिनु पज़ि तिय करान छुस बु बारबार,
 पापव तु शापव गोबरोव मे बार।
 ज़ांह ति मा ज़ोनुम मे भ्रम छु सम्सार॥
 गुल्य गॅन्डिथ च़ेय छुसय करान ज़ारु पार॥०॥

भावानायि ज़ूल कॅरिथ बनख गाशदार,
 प्रज़नावख अदु बबु सुंद दरबार।
 'बनसियो' सम्रणि सुमि लगिय तार॥
 गुल्य गॅन्डिथ च़ेय छुसय करान ज़ारु पार॥०॥



दून बैनिथ पान कोनु छुख दोनान

हा पानु पान पुननु छुख कोनु प्रजनान,
 दून बैनिथ पान कोनु छुख चु दोनान।
 क्व क्रेयायि निशि कोनु पोत चु फेरान॥
 दून बैनिथ पान कोनु छुख चु दोनान॥०॥

मोर पुननु जीव कोनु शवद छुख बनावान,
 शौद श्रूच अन्न अहार कोनु छुख करान।
 शवजरुक्क्यन व्यचारन मानि छुखनु चारान॥
 दून बैनिथ पान कोनु छुख चु दोनान॥०॥

सम्सार्य जंजालस मंज ह्यनु छुख यिवान,
 टास छुख कडान मंजु छुय अँथ्य बासान।
 छुख मरुन मँशरिथ नेन्द्र त्रावान॥
 दून बैनिथ पान कोनु छुख चु दोनान॥०॥

तारुकन कमन्द लॉयिथ वुडव चु त्रावान,
 मार्किन मंज कुनुय छुखनु वातान।
 नेबरु प्यठु अन्दर अचुनुच ह्यमथनु थावान॥
 दून बैनिथ पान कोनु छुख चु दोनान॥०॥

धनु द्वार वॅसीलदार कांह नु सहायता करान,
 वक्तु विज़ि बे यारु मदद गार छुख चु प्यवान ।
 ॐ नमः शिवाय ज़फ नखि डखि छु रोज़ान ॥
 दून बैनिथ पान कोनु छुख चु दोनान ॥० ॥

काँत्याह बलुवीर आयि चायि शुमशान,
 मरनुक शब्द ओस यिमुनय खरान ।
 वॅन्य वॅन्य वुछ वुछ कैह तिमन नु सारान ॥
 दून बैनिथ पान कोनु छुख चु दोनान ॥० ॥

संसार मस मोदुर जीव छुय बासान,
 अमि थोद ति वारयाह येति छु आसान ।
 मनशि जन्मुय छुय भवसर तार बनान ॥
 दून बैनिथ पान कोनु छुख चु दोनान ॥० ॥

‘बनसियो’ अँन्दरी छारुन चु ईशान,
 नेबुरु छा ब्याख कांह च़े सुत्य आसान ।
 ॐ नमः शिवाय रोज़ गरि गरि स्मरान ।
 दून बैनिथ पान कोनु छुख चु दोनान ॥० ॥



विकारन मंज चुय ब्बड्योख

विषयन पतु चु लारयोख, विकारन मंज चुय ब्बड्योख ।
मनशि यिय करान सोरयोख, विकारन मंज चुय ब्बड्योख ॥

विकार बारु सुतिन ग्वब्योख, व्वतलिस मंज चुय सज्योख ।
छूटि छूटि व्वन हा दब्योख, विकारन मंज चुय ब्बड्योख ॥

साम ह्यथ ति ज़ांह ना सन्योख, क्कर्मव अदु हा ब्रेट्योख ।
मोहें छटि व्वन्य पथर प्योख, विकारन मंज चुय ब्बड्योख ॥

मनशि रुप दयन सोजोख, लूभस तल हा दब्योख ।
छल छिदरि पतु लारयोख, विकारन मंज चुय ब्बड्योख ॥

अहंकारु बछि मंज तप्योख, बुय तु बुय हा च बन्योख ।
चु नय कुनि किन्य ति शम्योख, विकारन मंज चुय ब्बड्योख ॥

ग्वरु शब्दस कन नु दारयोथ, मनशि रुप रेंहज़नन नम्योख ।
रुचरस ग्वड ना बर्योथ, विकारन मंज चुय ब्बड्योख ॥

हा जीवु क्याज़ि भ्रम्योख, शिवस कुन कोनु नम्योख ।
'बनसी' चीर्य अथ सन्योख, विकारन मंज चुय ब्बड्योख ॥

चु छुख दाता

बु छुस पाँपी तु मानान छुस, चु छुख दाता बु ज्ञानान छुस।
 कर्यम नज़राह चे रोस अदकुस, चु छुख दाता बु ज्ञानान छुस॥
 मे यिय वोव तिय बु लोनान छुस, गेजव गँड्य गँड्य सोम्बरान छुस।
 करान आहार अम्युक फल छुस, चु छुख दाता बु ज्ञानान छुस॥
 पतय वेषयन बु दोरान छुस, विकारन लोलु सगुवान छुस।
 ग्यवान गूव्यंदु गू न्यथ छुस, चु छुख दाता बु ज्ञानान छुस॥
 फिरान माला ति रोज्ञान छुस, वुठन तुलु त्राव करान बुय छुस।
 पथर पेमत्यन नु तुलान थोद छुस, चु छुख दाता बु ज्ञानान छुस॥
 यि दयि गथ बुय हा चेनान छुस, बनान अन्ज्ञान यि चीनिथ छुस।
 बनान ओन यिय वुछिथ बुय छुस, चु छुख दाता बु ज्ञानान छुस॥
 यि मेचि मोर बुय सजावान छुस, अन्दर मनि हाय नु वालान छुस।
 करान त्रेशनायि क्वमु बुय छुस, चु छुख दाता बु ज्ञानान छुस॥
 मे दिम ज्ञानु धनु बु न्यधन छुस, मे चाव दानु रस त्रेशि होत छुस।
 करुम मनि श्वदी, चेनु अदु बु कुस, चु छुख दाता बु ज्ञानान छुस॥
 थँकिथ चेय कुन बु आमुत छुस, करुम माफ बुय खतावार छुस।
 मंगान 'बनसी' सोबूरय छुस, चु छुख दाता बु ज्ञानान छुस॥



ब्रह्मा छारुन

शिवु नाव युस म्वखस विज़ि विज़ि खारे,
 सुय भ्रम त्याँगिथ ब्रह्मा छारे ।
 यमु दारस तस कांह न साँ खारे ॥
 सुय भ्रम त्याँगिथ ब्रह्मा छारे ॥० ॥

दारनायि दानाह युस येति दारे,
 खसि सुय व्यमानुचि सवारे ।
 लगिनु ज़ांह सुय येति ग्रट् अनुवारे ॥
 सुय भ्रम त्याँगिथ ब्रह्मा छारे ॥० ॥

नव द्वार त्रौपरिथ युस ओमस गारे,
 चित्र गुप्त तस कथ कलम डाले ।
 ओंकारु व्यन्दुसुय त्वलि ललनावे ॥
 सुय भ्रम त्याँगिथ ब्रह्मा छारे ॥० ॥

त्रेशनायि लूभस युस येति मारे,
 काम, क्रूध, मोहस युस न्यवारे ।
 दय तस पानय भवसरस तारे ॥
 सुय भ्रम त्याँगिथ ब्रह्मा छारे ॥० ॥

भाव पूजा

ब्रह्म महूरतस युस लोलु ओश त्रावे,
भ्रम चॅलिथ प्रकाश अँन्दुर प्रावे।
अध्यात्म भावच सु ज्यूत्य प्रजुलावे॥
सुय भ्रम त्याँगिथ ब्रह्मा छारे॥०॥

कर्म भूमिकाये युस सगुनावे,
रुत कर्म ब्योल फलि फलि वाहरे।
यिय फसुल हरदु कालु गुरु कुन सारे॥
सुय भ्रम त्याँगिथ ब्रह्मा छारे॥०॥

मनु भावनायि युस धूप दुफ ज़ाले,
ही तु मादल व्यन पोश सारि डाले।
शिवु शिवु गरि गरि ज़ेवि उच्चारे॥
सुय भ्रम त्याँगिथ ब्रह्मा छारे॥०॥

कर्म धर्म सुत्य मनुश यूग बल प्रावे,
साधनायि सुत्य पान प्रजुनावे।
यूग बलु प्राण ब्रह्मांडस खारे॥
सुय भ्रम त्याँगिथ ब्रह्मा छारे॥०॥

कर्मन देंबिन्य दिथ युस कुचुनावे,
छेल्य छेल्य साधनायि तापु हवखनावे।
'बनसी' अँन्दुर मोचिथ तस मनुनावे॥
सुय भ्रम त्याँगिथ ब्रह्मा छारे॥०॥



अदु ज़ीवु प्रावखो म्वकलन पाय

येति जन्म दोरिथ रुत येलि करुखो,
 अदु ज़ीवु प्रावखो म्वकलन पाय।
 हनि हनि व्वन्दुसुय हाय येलि वालखो॥
 अदु ज़ीवु प्रावखो म्वकलन पाय॥०॥

ओरुत बैनिथुय हाल येलि बावुखो,
 आर यिथ दय मा करि कांह व्वपाय।
 श्वज़राह तु पज़राह येलि व्वतलावखो॥
 अदु ज़ीवु प्रावखो म्वकलन पाय॥०॥

दयि स्मरणि येलि मन चुय लागुखो,
 हनि हनि मल चॅलिथ नेरिय ग्राय।
 आत्म ज्ञान मील्लिथ च्यथ वुजनावखो॥
 अदु ज़ीवु प्रावखो म्वकलन पाय॥०॥

मनु मंदरस येलि लिवुनाह करखो,
 नेत्रु ज़लु गोड दिस अदु बरिय माय।
 पॅतिमि गरि शिव शिव येलि चुय ज़पुखो॥
 अदु ज़ीवु प्रावखो म्वकलन पाय॥०॥

पनुन तय परुद येलि कुनुय चुय ज्ञानखो,
 पानु शंकर दियिय रुचरुक दाय।
 अँन्दरिमिस शिवालस गणटा येलि वायिखो॥
 अदु जीवु प्रावखो म्वकलन पाय॥०॥

निष्काम रुत कर्म येलि जीवु करखो,
 श्वद अश्वद ब्योन कँडिथ बनियो व्वपाय।
 ज़िन्दु पानु पानस बाह तेलि करखो॥
 अदु जीवु प्रावखो म्वकलन पाय॥०॥

सूहमसू येलि अँन्दरी परखो,
 मनि च़लि गटु तय प्रकाश रटि जाय।
 शिवोहम क्षणु क्षणु ल्वलि ललुनावखो॥
 अदु जीवु प्रावखो म्वकलन पाय॥०॥

अहमस दुनन दिथ स्मरण येलि फिरखो,
 मनशि सुन्द लूटर रटन दूर जाय।
 काम, क्रूध 'बनसी' येलि दुनिथ त्रावखो॥
 अदु जीवु प्रावखो म्वकलन पाय॥०॥



पूजा करय शिव शंकरय

करनावि तार दिम भवुसरय, पूजा करय शिव शंकरय ।
 पजि मनु महिम्नापार परय, पूजा करय शिव शंकरय ॥
 चुय आदि, चुय अंत ईशरय, चुय अज चु पागाह अमरेश्वरय ।
 हँर्यश्वरु चे वास बेयि सँर्यश्वरय, पूजा करय शिव शंकरय ॥
 उमापती ही महीशरय, कास ज़ांड मै छुम चोन आसरय ।
 त्राव सेज नज़र चलिमे मरुमरय, पूजा करय शिव शंकरय ॥
 करु क्याह औनुस पापव अरय, पोशिवुन मै ज़ोन यि आडम्बरय ।
 अफसूस बु हा द्रास येति खरय, पूजा करय शिव शंकरय ॥
 ल्वकचार गिंदान द्राव जटा दरय, जवॉनी क्व कर्मव वॅर बरय ।
 आव बुजर तु लोगमो द्वह दरय, पूजा करय शिव शंकरय ॥
 पॅतिमि गरि गव जमाह गॅर्य गरय, वनुनि लॅम्य स्वरुन व्वन्य शंकरय ।
 वॉन्सि मा सोरुम व्वन्य क्याह स्वरय, पूजा करय शिव शंकरय ॥
 पंजरु मंजु तोतु येलि गव यलय, त्रौवहस दर्भि प्यठ खूच गरय ।
 जल तुल्यून गछन शुर्य व्यसमरय, पूजा करय शिव शंकरय ॥
 गरि गरि परुन पजि हरु हरय, तार लबख येमि कंठिनि भवुसरय ।
 शिव करिय दया वुछिथ चोन ऑरचरय, पूजा करय शिव शंकरय ॥
 गुल्य गॅन्डिथ छु 'बनसी' बर दरय, प्रोवुम नु कॅह छुम सोरुय परय ।
 कर दया यिनु मॅर्य मॅर्य मरय, पूजा करय शिव शंकरय ॥



छुय प्रणाम बारम्बार

शामु स्वंदरी बोजतम ज़ार,
 दिहि अभिमान, मद म्योन मार,
 साम पानस ह्यथ कर व्यचार,
 येलि हा यारिय लगिय अदु तार,
 ज्योन छु मरनुकय आधार,
 पानसुय मंज चे मूलादार,
 महादीवी करतु व्वपकार,
 सत् व्यचारु करु सतुक व्यवहार,
 युस ज़पान चोन नाव बारबार,
 मस गॅछिथ ग्यवान सु चॉन्य लोलु तार,
 कर्मु खुर्य कौरुस बु वारफतार,
 च्वपॉर्य बासान मे दज़ुवुन नार,
 दिम पनुन्य ज़ान ल्वति मे मोहँ बार,
 भ्रम छु संसार कांह नु कौन्सि यार,
 येछि तय पछि लोलु पोश चार,
 'बनसियो' लागु यि शूबिदार,

छुय प्रणाम बारम्बार ।
 छुय प्रणाम बारम्बार ॥
 माजि हुंद छुख कर्जदार ।
 छुय प्रणाम बारम्बार ॥
 मरुन छु ज्यनुकय सथ व्यचार ।
 छुय प्रणाम बारम्बार ॥
 बखशावतम सथ संस्कार ।
 छुय प्रणाम बारम्बार ॥
 तस बनान साक्षात्कार ।
 छुय प्रणाम बारम्बार ॥
 वैषियन हुंद बन्योस शिकार ।
 छुय प्रणाम बारम्बार ॥
 अदु करु बु निष्काम कार ।
 छुय प्रणाम बारम्बार ॥
 सतुकुय हो बनाव चंदनहार ।
 छुय प्रणाम बारम्बार ॥



संसार छु भ्रम

भ्रम छुय संसार कैरय तव व्यचार,
 दिहि अभिमानस छुन कांह सार ।
 दयि लोल बनॉविव पनुन आधार ॥
 दिहि अभिमानस छुन कांह सार ॥० ॥

निष्काम कर्म यियि ओर व्यस्तार,
 व्वपदीश केशव सुंद बनावुन यार ।
 स्वकर्म मोहें लरि गछि लुरपार ॥
 दिहि अभिमानस छुन कांह सार ॥० ॥

सथ व्यचार विषयन करान लारुलार,
 व्यतरावुन प्यवान छुन विकारु बार ।
 गचि मंदोरि मनचे बनान गाशदार ॥
 दिहि अभिमानस छुन कांह सार ॥० ॥

पान पनुन प्रज्ञनाव त्राव ग्वफु तु गार,
 सूहम परनु भ्रम चलि गछख बेदार ।
 अँन्दरिमिस भवनस छु आनन्दु द्वार ॥
 दिहि अभिमानस छुन कांह सार ॥० ॥

बोम्बुर बैनिथ गथ करुस बन हुशियार,
दयि लोलु ब्वद यियी बनिय गाटुजार।
अँन्दुरय लबुहन पनुन कर्तार।।

दिहि अभिमानस छुनु कांह सार।।०।।

म्वहताज दरिद्रस करुन व्वपकार,
व्वछि हँतिस त्रेशि हँतिस चाव पां दार।
सुय छुय बोड धर्म सुय दियिय तार।।

दिहि अभिमानस छुनु कांह सार।।०।।

निन्धा करनु पानस छिय खसान बार,
मनुसुय लगान दुयि हुंद जंगार।
पतु व्वथान पानय वुल्टु व्यचार।।

दिहि अभिमानस छुनु कांह सार।।०।।

मन कर थ्यर अछ अन्दर दर्बार,
'बनसियो' तँत्य वुछख साक्षात्कार।
दलि दुनिथ त्राव नेबरयुम व्यवहार।।

दिहि अभिमानस छुनु कांह सार।।०।।



बबु भगवानु प्यठ दयाये रोज़

द्वछि द्वछि पोश लागोय पूजाये,

बबु भगवानु प्यठ दयाये रोज़।

वीलु ज़ॉरी बोज़ कर पनुन साये॥

बबु भगवानु प्यठ दयाये रोज़॥०॥

श्वब दृष्टी मंगान छिय अँचिथ दारस,

अथु डाल ललाटस मुचरुन यिन द्वार।

द्यानु आहार दितु ब्वछि हँत्य आये॥

बबु भगवानु प्यठ दयाये रोज़॥०॥

यिम वॉत्य नखु तिमव प्रोव ग्वरु शब्दुय,

छ्यतु गव तिमन दिहि अहंकारु नार।

शेहजार प्रॉविथ लोब तिमव व्वपाये॥

बबु भगवानु प्यठ दयाये रोज़॥०॥

असि पथर पैमत्यन छु आसुर चोनुय,

चुय सोन सहाये तु यियतनय आर।

क्वकर्म कॅर्य तु गॅयि क्व वासुनाये॥

बबु भगवानु प्यठ दयाये रोज़॥०॥

भाव पूजा

ग्वरु दीवु फिर क्वकर्मव निशि सोन मन,
सतुके व्यवहारु बनहव सथज़न ।
अनाहत नादु चलिहे वॅह्य तु वाये ॥
बबु भगवानु प्यठ दयाये रोज़ ॥० ॥

यनु ज़ास तनु स्वरान वोतुम गरु गरु,
अरुसरव थोवहम मे वॉन्सि आवर्यार ।
मायायि ज़ालन थोवुस नु कुनि आये ॥
बबु भगवानु प्यठ दयाये रोज़ ॥० ॥

अज़ छु श्वब द्यन ग्वरु सुन्द वारुकारय,
आशिवान ननुवॉर्य लारान अँस्य आय ।
'बनसी' आव सॉरिय ह्यथ बॅखती भेक्षाये ॥
बबु भगवानु प्यठ दयाये रोज़ ॥० ॥



व्यनथ

द्यानु प्रकाश हावतम

अंधकार दूर करतम, द्यानु प्रकाश हावतम ।
ज्ञानु जूत्य प्रजलावतम, द्यानु प्रकाश हावतम ॥

ऑरचरु नाद बोजतम, वासना श्वद करतम ।
कहवचि स्वन मे कडतम, द्यानु प्रकाश हावतम ॥

ब्यमारस हाल प्रुछतम, दाद्यन दवाह करतम ।
अद्यात्मच वथ मे हावतम, द्यानु प्रकाश हावतम ॥

यिरुनिस तार दितम, आवुलुनि मंज कडतम ।
नावि नम पानु रठतम, द्यानु प्रकाश हावतम ॥

व्यचारन शोदी करतम, अनतःकरण शेहलावतम ।
मनु मन्दरु वास करतम, द्यानु प्रकाश हावतम ॥

वैषियन पतुनु दोरुनावतम, विकारन मे रोट करतम ।
येंदरेय मे शोमरावतम, द्यानु प्रकाश हावतम ॥

भाव पूजा

मनि सौबूर वुजनावतम,
शिवु शिवु परनावतम,

आस्था मे व्वतलावतम।
द्यानु प्रकाश हावतम।।

रुतुय रुत करनावतम,
अहम तय मद मे मारतम,

स्वक्रतुक खर्चनावतम।
द्यानु प्रकाश हावतम।।

सथ कर्म करनावतम,
पॅत्यमि गरि याद पावतम,

गीतायि कुन मन लागतम।
द्यानु प्रकाश हावतम।।

मनशस पोश मतु बनावतम,
लोलु मय दामु चावतम,

मनशि जन्मस मान थावतम।
द्यानु प्रकाश हावतम।।

कर्मु हान म्वकलावतम,
शिवु लोल वुजनावतम,

श्वब नज़र ग्वरु मे त्रावतम।
द्यानु प्रकाश हावतम।।

अनुग्रेह पनुन करतम,
'बनसियस' अथु मे डालतम,

पाप शाप मेय हरतम।
द्यानु प्रकाश हावतम।।



तार दिम, तार दिम कठिने भवु सरु

सम्सार सँदरस तार दिम हॅरी हरु,
 तार दिम, तार दिम कठिने भवुसरु।
 मन मोलुत छुम गोमुत कासतम थरुथरु॥
 तार दिम, तार दिम कठिने भवुसरु॥०॥

धनु द्वार सौम्बरिथ मेय कौरुम गरु गरु,
 ज़ांह सौरुम नु सुय गरु योत गछुन छुम।
 कॅतिमुतिस खुर आम वॅछुम अँन्दरी थरु॥
 तार दिम, तार दिम कठिने भवुसरु॥०॥

मोहॅ नार गोन्डनम ज़ांह कौरुमनु पान सरु,
 रुचरस रूदुस बु मूल प्राटान।
 सातु सातु असतस प्यठ कौरुम बावरु॥
 तार दिम, तार दिम कठिने भवुसरु॥०॥

दयि नाव स्वरुहा तु पेयिहम नु तेलि परु,
 च़लुहन मे अरुसरु बनि हैम कल्याण।
 पानस साम ह्यथ करुहन सरु खरु॥
 तार दिम, तार दिम कठिने भवुसरु॥०॥

सम्सार नेरिय नु सोर, कर मु गुरु गुरु,
स्वक्रतुक सोमबैरिथ थव तु अख अख ज़रु।
रामु रामु स्वरनु लगियनु प्राणन दुरु॥
तार दिम, तार दिम कठिने भवुसरु॥०॥

हरि ओमुक ज़फ कॅरिथ छुय च़लान मरु मरु,
सूहुम सू, सूहम सू मनु रोज़ स्वरान।
'बनसियो' तैलि च़लिय कालुनि बाम्बरु॥
तार दिम, तार दिम कठिने भवुसरु॥०॥



दम दम रोज़ सरखम

दम दम रोज़ सरखम, मद मॉरिथ च़लिय भ्रम ।
छुय अँन्दरु तँमिसुय नम ॥
मद मॉरिथ च़लिय भ्रम ॥० ॥

हर सातु पतु छुय यम, सतस सुत्य पानो शम ।
सतस्वरूप स्वरुन हे दम ॥
मद मॉरिथ च़लिय भ्रम ॥० ॥

येंद्रेयि करान छि लमु लम, विकार व्वपदावान अहम ।
विषयि करान छि बरहम ॥
मद मॉरिथ च़लिय भ्रम ॥० ॥

रुत्य कर्म करुन छु बोड धर्म, स्व कर्मव बनख व्वत्यम ।
सतुसुय दियिव प्रकरम ।
मद मॉरिथ च़लिय भ्रम ॥० ॥

लोलु छारुन तु गारुन, लोलुय बॉगरावुन ।
लोलु नावि लोलु रठ नम ॥
मद मॉरिथ च़लिय भ्रम ॥० ॥

शिवालन तु तीर्थन गछुन, दीवीदारन करुन दर्शुन।
स्यदु पीठन चुय नम॥
मद मॉरिथ च़लिय भ्रम॥०॥

दयि लोलु चेशमु कर नम, श्वज़र पज़र व्वतलि हर दम।
अदु करख निष्काम कर्म॥
मद मॉरिथ च़लिय भ्रम॥०॥

सू तु हू येम्य हा छोरुय, पान तॅम्य रथि खोरुय।
युन गछुन छु 'बनसियि' सितम॥
मद मॉरिथ च़लिय भ्रम॥०॥



कूठ मँजिल

करु क्याह अरु आस येमि सम्सारय,
ब्रोंठ छुम, मंजिल कूठ युथ नसों हारय।
पाप बोर नखि छुम करुम लोत बारय॥

ब्रोंठ छुम, मंजिल कूठ युथ नसों हारय॥०॥

दरमांदु छुस गोमुत बेयि वरफतारय,
नादन कन थवुम यियनय चें आरय।

चेय रोस दोयुम नु कांह छुम मे दिल दारय॥

ब्रोंठ छुम, मंजिल कूठ युथ नसों हारय॥०॥

कर्म खुर्य बु ग्यूरनस वेंछुम अँन्दरी थरय,
जॉनिथ स्वकर्मन कुन छुस फिरान थरय।

सेज नज़र करतु दयि युथ नु बुय तु बुय करय॥

ब्रोंठ छुम, मंजिल कूठ युथ नसों हारय॥०॥

लूभ तु ख्यूब छुय मे गिंदान टिकु तारय,
मोहें तु अहंकार करान मे आवारय।

दिहि अभिमान निवान छुम दिलुक करारय॥

ब्रोंठ छुम, मंजिल कूठ युथ नसों हारय॥०॥

खॉली अथ आख योर कर व्यचारय,
अथ हावान गछुनस छुय नु चारय।

त्युथ कर अनाहत हाविय नूरि अनुवारय॥

ब्रोंठ छुम, मंजिल कूठ युथ नसों हारय॥०॥

गरु खॉतरु छल कपट करान चु बिसियारय,
पननि खॉतरु क्याह कौरुथ तु कुस कारय।
त्युथ कर युथनु रोज़ि युन गछुन दुबारय॥

ब्रोंठु छुम, मंज़िल कूठ युथ नसॉ हारय॥०॥

दयि! दयि गॅच किन्य करुनाव श्वब कारय,
रुतुय रुत करुन बनि बोड सहारय।
रुचरुचि भावनायि नावि लगि तारय॥

ब्रोंठु छुम, मंज़िल कूठ युथ नसॉ हारय॥०॥

काया छय मेथ्या सनतु अथ वारय,
यूत बु त्यूत बडान छु अम्युक अमारय।
चेय मंज़ छु आत्मा शाश्वत हा यारय॥

ब्रोंठु छुम, मंज़िल कूठ युथ नसॉ हारय॥०॥

नेबर् त्रॉविथ अन्दर अछ हा बेकारय,
छॉन्ड दिथ अॅन्ध पॅक्य वुछख जहारय।
य्वहय गव स्वप्रकाश नमुस बार बारय॥

ब्रोंठु छुम, मंज़िल कूठ युथ नसॉ हारय॥०॥

अफसूस द्रावनु कॉन्सि सॉर्य सम्सारय,
भ्रम दिथ करान छुय यि पारु पारय।
'बनसियो' नम शिवस वनुस वीलु ज़ारय॥

ब्रोंठु छुम, मंज़िल कूठ युथ नसॉ हारय॥०॥



सत्ग्वरस करव ज़ारु पार

सत्ग्वरस करव ज़ारु पार, अदु लगि नावि सानि तार ।
कासुवुन सु मोहँ अंधकार, अदु लगि नावि सानि तार ॥०॥

पौंदु कर ज़ीवु श्वद व्यचार, अन्तर आत्मा दियिय व्यस्तार ।
पतु करखनु छोन कारुबार, अदु लगि नावि सानि तार ॥

तपस्या तु बेयि कीर्तन, श्वद करान अनतःकरण ।
छूयतु करान नर्कुन नार, अदु लगि नावि सानि तार ॥

येलि नु चंदस आसि खँन्ड हार, नावु हौंजं करान छु तकरार ।
छुन बनान टुंकि रोस तार, अदु लगि नावि सानि तार ॥

मनि कासान ग्वर अंधकार, बँखुत्यन सु बखशनहार ।
कर्म ज्ञान छु गीता सार, अदु लगि नावि सानि तार ॥

ग्वरु वाक्य ज्ञान ओंकार, सुय गव ज़गथ आधार ।
सुय करान छु च्यथ बेदार, अदु लगि नावि सानि तार ॥

श्रोचि अन्नु करसौं आहार, भावु च़ॉन्नय ज़ाल बेशुमार ।
शूबान अँन्दुर मूलादार, अदु लगि नावि सानि तार ॥

भाव पूजा

क्षण क्षण रोज़ हुशियार,
काम, क्रोध, मद, अहंकार,
ज़गि लूटर छि तयार ।
अदु लागि नावि सानि तार ॥

मोहें त्यंबुर गंडान अँन्दुर्य नार,
भक्ति रस छु अमर्यतु दार,
सॉरिसुय करान सम्हार ।
अदु लागि नावि सानि तार ॥

सत्स्वर सोन रक्षाकार,
सुय छु सोन पालनहार,
कासान अज्ञानु अंधकार ।
अदु लागि नावि सानि तार ॥

सत् संगय यिवान सथ व्यचार, क्व संगस लैगिथ गछान खार ।
'बनसियो' ज़न्म चु रथि खार ॥
अदु लागि नावि सानि तार ॥



अथुरोट कर

हचर लद छुस प्योमुत पादन तल,
अथुरोट कर, बन्यम मुशिकलन सहल।
ललाटस अथु डाल चलयम गांगल॥

अथुरोट कर, बन्यम मुशिकलस सहल॥०॥

चुय दाता छुस बु दास बरस तल,
नज़रि पनुनि कासुम मनुसुय मल।
धर्मचि वेरि दिम कर्मुक बल॥

अथुरोट कर, बन्यम मुशिकलस सहल॥०॥

क्व-कर्म छु हैछिनावान कपट तु छल,
पतु विकारन लगान मद करान वदल।
रुतिस तु वुल्टस छि ब्योन ब्योन फल॥

अथुरोट कर, बन्यम मुशिकलस सहल॥०॥

न्याय अँज़रनस क्युत बनान आत्मु बल,
सतस तु असतस लगान छे ठवलु ठवल।
ज्ञाँनी स्व ब्वदि, क्व ब्वदि छिय दिवान दल॥

अथुरोट कर, बन्यम मुशिकलस सहल॥०॥

विषयि छय करान मनशस हॉन्कल,
अचारस व्यचारस करान छि अँदरु खल ।
काम क्रूध, लूभ, रटान पंजनय तल ॥
अथुरोट कर, बन्यम मुशिकलस सहल ॥० ॥

जीव ज्ञानतु संसार बस ग्रटु बल,
वारि पनुनि पेहतु फल नेरि मावि तल ।
साधनायि श्रानस वस चु यारुबल ॥
अथुरोट कर, बन्यम मुशिकलस सहल ॥० ॥

बलु वीरव प्रोव येति ब्वजु बल,
वीर गती नियि तिमव अदु जल जल ।
दिचु बॅली तिमवुय मसलु गव हल ॥
अथुरोट कर, बन्यम मुशिकलस सहल ॥० ॥

पर व्वपकारस छि रुति रुत्य फल,
हिशरस कुनिरस कुन कॅरिव कल ।
'बनसियो' लाग शिवस ब्यलु तु मादल ॥
अथुरोट कर, बन्यम मुशिकलस सहल ॥० ॥



जय जय कृष्ण मुराँरी

नाँल्य छिय जामु जरकाँरी,	जय जय कृष्ण मुराँरी।
जगतुक छुख कल्याण काँरी,	जय जय कृष्ण मुराँरी॥
डेडि तल आस करनि ज़ाँरी,	शामु स्वंदरु करतम याँरी,
अदु हरन मे पाप शाप साँरी,	जय जय कृष्ण मुराँरी॥
कर्मव किन्य तुजिम खाँरी,	राँवुम साँरुय ज्ञानकाँरी।
व्वपदेयम मे बे कराँरी,	जय जय कृष्ण मुराँरी॥
संसार छु ग्रुठ अनुवाँरी,	वारि वारि नेरान छि साँरी।
युन गछुन छु ग्वडु प्यठ जाँरी,	जय जय कृष्ण मुराँरी॥
ही गूवर्धनु धाँरी,	रँछिथख गूर्य शुर्य साँरी।
यँन्द्राज़ु गव हाँर्य हाँरी,	जय जय कृष्ण मुराँरी॥
गूपियन काँसुथ लज़ तु खाँरी,	श्रानु विज़ि वस्त्र नियथख साँरी।
काँसथख साँरुय पर्द दाँरी,	जय जय कृष्ण मुराँरी॥
धर्मुक बल दितु गिरधाँरी,	दितु ब्वद बनव व्वपकाँरी।
विषयन युथनु रोज़ि राहदाँरी,	जय जय कृष्ण मुराँरी॥
कन्सन सूज़्य अत्याचाँरी,	साँरी गँयि तिम हाँर्य हाँरी।
पूतनायि प्राण दित्य पुजाँरी,	जय जय कृष्ण मुराँरी॥
क्वकर्म बनावान अहंकाँरी,	चानि डखि पांडवव कोरव माँरी।

गीता सार 'बनसियो' तारी॥

जय जय कृष्ण मुराँरी॥



भाव पूजा

विषयि छय करान मनशस हॉन्कल,
अचारस व्यचारस करान छि अँदुर खल।
काम क्रूध, लूभ, रटान पंजनय तल॥
अथुरोट कर, बन्यम मुशिकलस सहल॥०॥

जीवु ज्ञानतु संसार बस ग्रटु बल,
वारि पनुनि पेहुतु फल नेरि मावि तल।
साधनायि श्रानस वस चु यारुबल॥
अथुरोट कर, बन्यम मुशिकलस सहल॥०॥

बलु वीरव प्रोव येति ब्वजु बल,
वीर गती नियि तिमव अदु जल जल।
दिचु बॅली तिमवुय मसलु गव हल॥
अथुरोट कर, बन्यम मुशिकलस सहल॥०॥

पर व्वपकारस छि रुति रुत्य फल,
हिशारस कुनिरस कुन कॅरिव कल।
'बनसियो' लाग शिवस ब्यलु तु मादल॥
अथुरोट कर, बन्यम मुशिकलस सहल॥०॥



जय जय कृष्ण मुराँरी

नॉल्य छिय जामु जरकाँरी,	जय जय कृष्ण मुराँरी ।
जगतुक छुख कल्याण काँरी,	जय जय कृष्ण मुराँरी ॥
डेडि तल आस करनि ज़ाँरी,	शामु स्वंदुर करतम याँरी,
अदु हरन मे पाप शाप साँरी,	जय जय कृष्ण मुराँरी ॥
कर्मव किन्य तुजिम खाँरी,	राँवुम साँरुय ज्ञानकाँरी ।
व्वपदेयम मे बे कराँरी,	जय जय कृष्ण मुराँरी ॥
संसार छु ग्रट अनुवाँरी,	वारि वारि नेरान छि साँरी ।
युन गछुन छु ग्वडु प्यठु जाँरी,	जय जय कृष्ण मुराँरी ॥
ही गूवर्धनु धाँरी,	रँछिथख गूर्य शुर्य साँरी ।
यँन्द्राजु गव हाँर्य हाँरी,	जय जय कृष्ण मुराँरी ॥
गूपियन काँसुथ लज तु खाँरी,	श्रानु विजि वस्त्र नियथख साँरी ।
काँसथख साँरुय पर्दु दाँरी,	जय जय कृष्ण मुराँरी ॥
धर्मुक बल दितु गिरधाँरी,	दितु ब्वद बनव व्वपकाँरी ।
विषयन युथनु रोज़ि राहदाँरी,	जय जय कृष्ण मुराँरी ॥
कन्सन सूज्य अत्याचाँरी,	साँरी गँयि तिम हाँर्य हाँरी ।
पूतनायि प्राण दित्य पुजाँरी,	जय जय कृष्ण मुराँरी ॥
क्वकर्म बनावान अहंकाँरी,	चानि डखि पांडवव कोरव माँरी ।

गीता सार 'बनसियो' तारी ॥

जय जय कृष्ण मुराँरी ॥



भाव पूजा

चु पँद्य



गुप्त रोज़ गुप्त रोज़ स्मरुन दय ।
युथ नो छिम्ब गछिय राविय लय ।
हरु हरु माल फिर चलिय अदु भय ।
पज़रस लय बर स्व छे बँड क्रय ॥



हावु बावु रोस कर शंकरस जय ।
अन्दरुय मोचिथ चलिय शुमशानु भय ।
क्रय कर स्वक्रेयायि टोठिय दय ।
लल देदि शोमुर पान लोबुन पोज़ पय ॥



अहमन कोरनख जीवु लाचार ।
यीरान नाव चॉन्य गाढुकनु वार ।
ह्यसु युथनो डलख गछख अज़कार ।
शिव शिव स्वर लगिय भवसरु तार ॥





पनुन पान योत स्वरान गोख बेहाल ।
गृहस्तुक्य मोहन कोरनख कंगाल ।
मॉर्यफतु तार वज़नु च़लियो मलाल ।
स्व क्रैयायि करतु ज़ीवु प्रावख कमाल ॥



विषयि युस कापि रटि थ्यर थवि मन,
तँस्य मेलि साक्षात शिवु दर्शन ।
भव बंधनव निशि यस मेलि छ्यन ।
सुय ज़ीव ऑखरस छु मुक्ती लबन ॥



भाव पूजा

ज्ञान गछि अदु ईशानस सुत्य

गछ कर प्रक्रम पनुनिस पानस,
ज्ञान गछि अदु ईशानस सुत्य।
अँन्दरय राजु पानु बिहिथि दुकानस॥
ज्ञान गछि अदु ईशानस सुत्य॥०॥

शमु दमु के ज़ोरु लार कर अहमस,
समुयन अमि सुत्य गॉलिय कुत्य।
ज़ोल पानस दिथ मूल प्राट हामस॥
ज्ञान गछि अदु ईशानस सुत्य॥०॥

शिब्री हुंघ पॉट्य लवु कर पानस,
ज्ञानु भन्डारु समि अकि दानु सुत्य।
चोक मोदुर ब्योन कड़ ख्याव भगवानस॥
ज्ञान गछि अदु ईशानस सुत्य॥०॥

कर्मन शोदी कर रोज़ मंज़ दानस,
ज्ञान गछिय अन्तर आत्महस सुत्य।
आत्मा छु शाशवत सन चु अथ ज्ञानस॥
ज्ञान गछि अदु ईशानस सुत्य॥०॥

विषयवभ्रम दिथ चोनुख मय खानस,
 विकारव नचनोवुख पनुनि खुमारु सुत्य।
 दकु दोल क्याह लॅगिय च़ेय अनज़ानस॥
 ज्ञान गछि अदु ईशानस सुत्य॥०॥

दयि लोलु अमरयथ रोज़ख बरान बानस,
 येलि ओमुक महामन्त्र परख लोलु सुत्य।
 सूहम ओमु ज़पु खोचखनु शुमशानस॥
 ज्ञान गछि अदु ईशानस सुत्य॥०॥

येन्द्रेय शोमरिथ ज़ूल कर महल खानस,
 राज़ु बलु राज़ु यियि शूबायि सुत्य।
 दिहि अभिमान शोमर लबख आत्म ज्ञानस॥
 ज्ञान गछि अदु ईशानस सुत्य॥०॥

आत्म ज्ञान मेलान छुय शोदिस पानस,
 पांछ त्वतव श्वद कर दयि लोलु सुत्य।
 गन्ड खुलि ज़ालन तु बाह करख पानस॥
 ज्ञान गछि अदु ईशानस सुत्य॥०॥

कर्म फल छु तुलुन च़े कुनिस पानस,
 कांह करिय नु सहायता धनु द्वारु सुत्य।
 यि ववख ति लोनख सन गीता ज्ञानस॥
 ज्ञान गछि अदु ईशानस सुत्य॥०॥

भाव पूजा

हा जीवु क्याह गोय सन्योख कोनु पानस,
मनुशि जन्म रावुरुथ अज्ञानु सुत्य ।
हॅरिथ प्योमुत चु मंज वॉरानस ॥
ज्ञान गछि अदु ईशानस सुत्य ॥० ॥

कामनायि चोननख तिलवॉन्य वानस,
तिलवॉन्य दांद बन्योख त्रेशनायि सुत्य ।
थॅकिथ छेनिथ मोत मंगान छुख भगवानस ॥
ज्ञान गछि अदु ईशानस सुत्य ॥० ॥

भावु पोश चॉरिथ लाग भगवानस,
खीरु खन्हु थाल शेर श्रद्धायि सुत्य ।
दयि गथ चेनख 'बनसी' येलि सनख पानस ॥
ज्ञान गछि अदु ईशानस सुत्य ॥० ॥



— चु पेंद्य —

खोल मनु दार वुछ सब्जार,
 प्रथ अन्दु डेशख तसुन्द आकार ।
 कुम्युर तय वन हॉर तोतु गुफतार ।
 गूव्यंदु गू ग्यवान सूहम तार ।।



सुबहुक वाव परान सूहम सू ।
 पन वेंथरव गोज़ शिव शम्भू ।
 पोशिनूलन पोर हू तय हू ।
 रुचराह कॅरयज्यव मेलिवु सू ।।



अज्ञानन कौरुख जीवु चु वरफतार ।
 दयि नाव स्मरणु चलिय अहंकार ।
 अहमुच गांगल करान चें लारु लार ।
 श्वद कर्म दिवान जीवु करनावि तार ।।



यिय करख मनशि तिय यियी चें बकार ।
 रुचरु सुत्य बनिय अँन्दरु साक्षात्कार ।
 अष्टु दलु हृदय फवलिय अँचिथ दर्बार ।
 अँन्दरु ठोकरस नमन कर साँ बारबार ।।



भाव पूजा



बनुन तय गुदरुन कर जीवु स्वीकार ।
अमि सुत्य चुय करख त्रेशनायि लार ।
युथनो छिम्ब गछिय बनख लाचार ।
शिव शिव स्वरान रोज बनख गाशदार ॥



प्रथ अन्दु शॉन्ती तय शेहजार ।
कॉन्सि हुन्ज नु निनदाह फकत गाटुजार ।
हर कांह पानस पानु राजदार ।
यि व्यनथ मॉलिकस करान बु बार बार ॥



सू तय हू

स्वर पनुनुय पान छांडुन हू,
अछ अन्दर अँत्य छुय सू तय हू।
सुबहुक वाव ग्यवान गूव्यन्दु गू॥
अछ अन्दर अँत्य छुय सू तय हू॥०॥

द्यान दोरिथुय प्रावख ख्वशबू,
नतु बोरुथ ठेलु छुय यथ छि बद बू।
विकार, विषयि करान ज़ीव मन क्रूह॥
अछ अन्दर अँत्य छुय सू तय हू॥०॥

प्राण खसवसि मंज रोज़ स्मरण,
मन मौलुत करनस छुखनु बाज़ुय यिवान।
त्रेशनायि नारस क्याह साँ करि फू॥
अछ अन्दर अँत्य छुय सू तय हू॥०॥

मॉर्यफतु तार येलि वज़ान हर सू,
मस गँछिथ छुख ग्यवान शिव शम्भू।
सत्चित आनन्द छु सू तय हू॥
अछ अन्दर अँत्य छुय सू तय हू॥०॥

भाव पूजा

योद चे छांडुन छुय अँन्दरु गारुन,
नेबरु कुनि नु मेलिय गछि यि मानुन।
श्वदि मनु चु बोझख कुकिलि गू गू॥
अछ अन्दर अँत्य छुय सू तय हू॥०॥

हा मनशि स्मरुन चु सूहम सू,
युथ हा लय गछिय मेलिय अदु हू।
अँन्दरु नेबरु हर शायि सुय छु बस सू॥
अछ अन्दर अँत्य छुय सू तय हू॥०॥

ग्वर शब्द सोर्यथुय मँशरख बुय,
सहस्रदल शांत गछि येलि स्वरख सू।
अनाहत चँक्र हावि प्रकाश सू बँ सू॥
अछ अन्दर अँत्य छुय सू तय हू॥०॥

येलि यछख वुफ तुलख असमानस,
ब्रुन्जिस मंज फेरख कुलि जहानस।
तिमन वनान साधक चु मा छुख सू॥
अछ अन्दर अँत्य छुय सू तय हू॥०॥

‘बनसियो’ आवलुनिस मंज चु यीरान,
कोनु छुख व्यचारान कोनु ह्यसु प्यवान।
नाव बँठिस लगिय वायख येलि प्यूह॥
अछ अन्दर अँत्य छुय सू तय हू॥०॥

श्री रामु अनि गटु करतम दूर

कालु भय कासतम दान दारनावतम,

श्रु रामु अनिगटु करतम दूर ।

गूर गूर करयो अहम भाव कासतम ॥

श्रु रामु अनि गटु करतम दूर ॥० ॥

आँदीनन अथु रोट करनावतम,

द्वखु ज़दन मदद करनावतम पूर ।

पथर पेमुत्य थफ कॅरिथ थोद तुलु नावतम ॥

श्रु रामु अनि गटु करतम दूर ॥० ॥

बोम्बरु सुंजि गुंगरायि मंज़ बोज़ुनावतम,

रामु रामुक सोज़ सुति पूरि पूर ।

युथ नसॉ बु वति डलु सेज़ि वति लागतम ॥

श्रु रामु अनि गटु करतम दूर ॥० ॥

येंद्रेय म्यानि श्वज़रस कुन लागतम,

युथ विकार विषयि रोज़न मे निशि दूर ।

द्रडतायि कुलिस सुत्य थख द्यावनावतम ॥

श्रु रामु अनि गटु करतम दूर ॥० ॥

भावनायि रत्न दीप अँन्दरु ज़ालुनावतम,

ही तु मादलि दिमु छॉन्डाह बु पूर ।

बॅर्गु बॅर्गु चॉरिथ पूज़ि लागुनावतम ॥

श्रु रामु अनि गटु करतम दूर ॥० ॥

भाव पूजा

असथ तय अहंकार दुयी म्यॉन्य हरतम,
अष्ट दल हृदयस मंज करय गूर गूर।
सूहमसू माल अँन्दुर फिरुनावतम॥
श्रु रामु अनि गटु करतम दूर॥०॥

ही रामु अनतःकरण म्यॉन्य श्वद करतम,
वशकुय दशि रावुन युथ गछि दूर।
प्रेयमु साफि प्रेयमु रस वारु फ्यारुनावतम॥
श्रु रामु अनि गटु करतम दूर॥०॥

येन्द्रेयि शोमरिथ स्मरण फिरुनावतम,
सूहम सोरिथुय यियि हे सरूर।
अमि सरूरु बाहनायि श्रवन करनावतम॥
श्रु रामु अनि गटु करतम दूर॥०॥

रामु रामु विजि विजि मेय परनावतम,
काम, क्रूध, लूभ तु मोह हैयि हे दूर।
'बनसियो' अनाहतु प्रकाशि शोलु नावतम॥
श्रु रामु अनि गटु करतम दूर॥०॥



गाशिलिस रूदुख अँछ मूरान

अँन्य सारि वनतु पानु क्याह चुय छारान,
गाशिलिस रूदुख चु अँछ मूरान।
अहमु किन्य वावस गोख गेजि चु करान॥
गाशिलिस रूदुख चु अँछ मूरान॥०॥

हर सातु पनुनुय पान रूदुख रंजनावान,
अथ मेचि मँरिसुय ललु खोल करान।
चुय छुख आत्मा यिय गोख मँशरान॥
गाशिलिस रूदुख चु अँछ मूरान॥०॥

येरि हू कँरिथ गोख गरुबाराह बरान,
फीर्य फीर्य यि त्रेशनाह रूजुय व्वपदान।
सोम्बरिथ शाहमारु संज रौछा करान॥
गाशिलिस रूदुख चु अँछ मूरान॥०॥

क्याजि छुख पनुनुय पान चुय भ्रोमरान,
छायन हुटु मुटु क्वमु क्वम करान।
यिनु कैह छु तँथ्य छुख पोज चुय मानान॥
गाशिलिस रूदुख चु अँछ मूरान॥०॥

अकि कोहँ छुख खसान बेयि कोहँ छुख वसान,
यिय कँर्य कँर्य छुख वॉन्स रावुरान।
बुजर वॉतिथ छय जंगु नरि नटान॥
गाशिलिस रूदुख चु अँछ मूरान॥०॥

छुख अँतिय लार अँतिय दार वातान,
 यिय कँरिथ ज़न्म छुय निरिधार बनान।
 मुखु पानु क्याह गोय कोनु ह्यसु चु यिवान॥
 गाशिलिस रूदुख चु अँछ मूरान॥०॥

करतु आत्म मनथन व्वन्य चुय नादान,
 भ्रमस पतु दोरयोख दय नु छारान।
 अहम भाव त्राव रोज अँन्दरी शमान॥
 गाशिलिस रूदुख चु अँछ मूरान॥०॥

सोंतु श्वंग त्रॉवथ ब्याख बंजर गव पुटान,
 लूभ ख्यूब गोय गर्जु ओन बनावान।
 हर्द डूर चे खॉली, ब्याख फसलाह वटान॥
 गाशिलिस रूदुख चु अँछ मूरान॥०॥

छारुनच चे कामना, रोज अँन्दरु गारान,
 हर सातु चे सुत्य सुत्य गछ यि मानान।
 सतचि वति पँकिथुय कांह नसॉ हारान॥
 गाशिलिस रूदुख चु अँछ मूरान॥०॥

सतचि वति पँकिथुय मेलिय आत्म ज्ञान,
 अदु जीव करख दयि सुन्द गुणगान।
 महॉजोति मंजु गछख जुचु अदु वुछान॥
 गाशिलिस रूदुख चु अँछ मूरान॥०॥

दिहि अभिमान त्राव अँय मूर्ख इन्सान,
 कांह करिय नु सहायता स्वरुन चु नारान।
 'बनसी' अन्दर अँचिथ अन्दरुय छु आसान॥
 गाशिलिस रूदुख चु अँछ मूरान॥०॥

लोल नाद

समयाह गुजरयोव छुस बु प्रारान,
 कर यिख चु करनावख पनन्य मे ज्ञान।
 यि अन्ज्ञान दर्शनस चॉनिस छु प्रारान॥
 कर यिख चु करनावख पनन्य मे ज्ञान॥०॥

बूजुमत छु पॉपियन गाह बेगाह बखशान,
 बु ति अखा तिमवुय मंजु करतु पुरसान।
 छम खबर ग्वसु छुय मेय कर्म छिनु जान॥
 कर यिख चु करनावख पनन्य मे ज्ञान॥०॥

वति डॅलिमुत्यन छुख सेंजि वति लागान,
 कर्मु हीनन छुख माफ चुय करान।
 ब्रह्म जॉन्य रॅस्यत्यन छुख दिवान ज्ञान॥
 कर यिख चु करनावख पनन्य मे ज्ञान॥०॥

ऑर्चर बोज़तम छुम नु कैह ति ज्ञान,
 बंगि मंजु नचुनाह छुस मॅन्ज्य करान।
 यिथि व्यवहारु पान शोमरिथ नु ह्यकान॥
 कर यिख चु करनावख पनन्य मे ज्ञान॥०॥

ललु खोल पानु छुख कायायि करान,
 यिना केह छु अमि खोतु ति बैयि छु आसान ।
 सत् चित्त आनन्द आत्मा तथ वनान ॥
 कर यिख चु करनावख पनुन्य मे ज्ञान ॥०॥

यिम रूद्य माला चॉन्य दोहें दिश ज़पान,
 अद्यात्मु गाशि तिमय ब्रॉह गॉयि पकान ।
 विषयि तिमनुय छेनु हरगिज़ ति व्यापान ॥
 कर यिख चु करनावख पनुन्य मे ज्ञान ॥०॥

साधुकन आशि तोश छु मान बँडुरावान,
 नाकारु क्व पौत्रन ति मॉफी दिवान ।
 धर्म ज्ञानु रँस्यत्यन ति छु वथ हावान ॥
 कर यिख चु करनावख पनुन्य मे ज्ञान ॥०॥

हा पानु नस रँटिथ केह नु हॉसिल यिवान,
 योत तॉन्य नु अँन्दुर नेबरु रोज़ख लिवान ।
 अँन्दरिमिस शिवालस रोज़ गन्टा वायान ॥
 कर यिख चु करनावख पनुन्य मे ज्ञान ॥०॥

ग्वर छुय अंधकारु मंजु प्रकाश हावान,
 युस बैखुत्य ग्वरु दारु ड्यकु छु नौमरान।
 तस ग्वरस छि भगवान गोपीनाथ बब वनान॥
 कर यिख चु करनावख पनुन्य मे ज्ञान॥०॥

कर्मन शोदी कैरिथ अदु पानु कैरिज दान,
 अमि रोस कैत्य कैत्य अकोत छु सपदान।
 ललदेदि, र्वपु देदि ग्वरु सुन्द यि व्याख्यान॥
 कर यिख चु करनावख पनुन्य मे ज्ञान॥०॥

लोलु कान लॉयिथ अँन्दरी छुस व्यतरान,
 रुमु,रुमु आशि तोश व्वलसुनस यिवान।
 दारि बर त्रौपरिथ अँत्य गथ छुस करान॥
 कर यिख चु करनावख पनुन्य मे ज्ञान॥०॥

पॉपियन दयि पाप शाफ चुंय गालान,
 येलि पजि मनु तिम व्यनॅथ चै करान।
 हचर लद 'बनसी' छु लोलु नाद चै लायान॥
 कर यिख चु करनावख पनुन्य मे ज्ञान॥०॥



आमुत छुस डेडितल सवॉल्य

चंदु छोन अनि क्याह डॉल्य, आमुत छुस डेडितल सवॉल्य।
चुय दातु केंड्यज्यम नु खॉल्य, आमुतछुस डेडितल सवॉल्य॥

क्याह करु मन छुम वुबॉल्य, कति कोर मे वातनावान।
व्वथान ज़ख्मन मे परकॉल्य, आमुतछुस डेडितल सवॉल्य॥

रुचरुच माल त्राव नॉल्य, रुतुय रुत रोज़ च़ेनान।
बेंदी कुत्य बलुवीर गॉल्य, आमुतछुस डेडितल सवॉल्य॥

ज़रकॉर्य जामु छिय नॉल्य, साधक च़े ल्वलि ललुवान।
फेरान बु क्याज़ि बॉल्य बॉल्य, आमुतछुस डेडितल सवॉल्य॥

व्यनु गुलाब बु अनय डॉल्य, शेरि रोज़ माजि लागान।
गुल्य गौंडिथ छि मंगन वॉल्य, आमुतछुस डेडितल सवॉल्य॥

ह्यसु आस मॉज यँचकॉल्य, व्वन्य हय छुस नाव चोन स्वरान।
त्राव मलालु यितु म्योन सॉल्य, आमुतछुस डेडितल सवॉल्य॥

लूभन मोहन अँस्य गॉल्य, क्रुडु थॅर ज़न नाल वलान।
कर कृपा बनव बलुशॉल्य, आमुतछुस डेडितल सवॉल्य॥

शीतल स्वभाव चोन कृपॉल्य, दानु भिक्षा छुस मंगान।
नतु कॅल्य कॅल्य अकोत नॉल्य, आमुतछुस डेडितल सवॉल्य॥

कश्यप मरुच हय ग्वणु मॉल्य, धर्मस ग्वड छख बरान।
बॅखुत्यन हुंज्य चु दयि मॉल्य, आमुतछुस डेडितल सवॉल्य॥

शरणागतन हुंज्य मशॉल्य, मनि मंदर शोलु नावान।
चानि नावुच माल छुनान नॉल्य, आमुतछुस डेडितल सवॉल्य॥

नाव सॉन्य लाग बॉल्य बॉल्य, आवलुनिस मंज छि यीरान।
वोन 'बनसियन' प्रभातु कॉल्य, आमुतछुस डेडितल सवॉल्य॥



वलो व्वन्य लोल आमो

लोलु रस चोम दामु दामो,
चानि समरणि शीर द्रामो,

वलो व्वन्य लोल आमो ।
वलो व्वन्य लोल आमो ॥

मे छोरुख शहरु गामो,
अथि आमनु द्रास बु खामो,

गंयम ब्रॉचंसुबु शामो ।
वलो व्वन्य लोल आमो ॥

सूजमय लोलु पयमानो,
असलुक पय कुनिनु द्रामो,

चे लोगथम गॉरज़ानो ।
वलो व्वन्य लोल आमो ॥

वैनिम मेत्रन कुनिय कथ,
अन्यन अँछन गाश आमो,

गरि हा छुय फेर व्वन्य पथ ।
वलो व्वन्य लोल आमो ॥

सोद्यवोन्य छारनि द्रामो,
मस्त मलंगस पतु द्रामो,

शुर्यन सुत्य फेरानो ।
वलो व्वन्य लोल आमो ॥

यछ पछ येलि व्वपदानो,
खुरिस अदु खुर हा द्रामो,

मँजिल ब्रोंठकुन यिवानो ।
वलो व्वन्य लोल आमो ॥

विश चु आहार करानो,
तवय नील कंठ चे नामो,

अमर्यथ बेयन बॉगरानो ।
वलो व्वन्य लोल आमो ॥

दिहि अभिमान छु मँचरानो, क्रुडु थँर यि नाल वलानो ।
हॉसिल ना कैह यिवानो, वलो व्वन्य लोल आमो ।।

शिव शिवय युस ज़पानो, सुय मकाम प्रावानो ।
आवा गमन तस छ्यनानो, वलो व्वन्य लोल आमो ।।

ब्यन तु दय येलि नेरानो, आत्म ज्ञान छु व्वपदानो ।
छु 'बनसी' आसन शेरानो ।।
वलो व्वन्य लोल आमो ।।



सथ ग्वरस ज़ारु पारु

बबु भगवानु म्यानि, ही म्यानि सथ ग्वरु,
 बवुसरु तार दिम करतु व्वपुकार ।
 यिरुवन्य नाव छम द्वह लोगमुत दुरु ॥
 बवुसरु तार दिम करतु व्वपुकार ॥० ॥

ज़न्माह वौतुम मे करान अरुसरु,
 कांह मौज़िल लोबमस नु छुस लाचार ।
 कर दया दृष्टी बनतु म्योन रँहबरु ॥
 बवुसरु तार दिम करतु व्वपुकार ॥० ॥

गरु गरु करान गोमुत छुस यँच बर,
 कैह नन्योम नु सथ ग्वरु अमिकुय सार ।
 त्रेशनायि लूभन ज़रु चोन ज़रु ज़रु ॥
 बवुसरु तार दिम करतु व्वपुकार ॥० ॥

मोह अंधकारन कोरनस व्यसमरु,
 गटु ज़ोल च्वपौर्य छुम बेयि लारु लार ।
 गोब बोर मटि हुम किथु अपोर तरु ॥
 बवुसरु तार दिम करतु व्वपुकार ॥० ॥

अँन्यसारि छारान छुस आमुत अरु,
 छायेन व्वम कँरिथ कँह द्राम नु सार ।
 अपरामुक गाश हाव गँछ्यतनय ज़रु ज़रु ॥
 बवुसरु तार दिम करतु व्वपुकार ॥० ॥

सम्सार ज़ोनुम छु यि वांगुज गरु,
 तोति ह्यसु नो यिवान बुय नादार ।
 नावि नम रठतम च़लिहेम मरु मरु ॥
 बवुसरु तार दिम करतु व्वपुकार ॥० ॥

पँत्यमि गरि प्राण म्यॉनी येलि लगन हरु,
 सनम्वख रूज़िथ लौचुरतम बारु ।
 यूग नेद्रायि वँथ्यज़ि ही यूगीश्रवरु ॥
 बवुसरु तार दिम करतु व्वपुकार ॥० ॥

‘बनसी’ डेडि तल बावान औरच़रु,
 कन थाव सथ ग्वरु लग्यम अदु तारु ।
 अन्त समयस बबु कॉस्यज़्यम यमु थरु ॥
 बवुसरु तार दिम करतु व्वपुकार ॥० ॥



भाव पूजा

टाठि ग्वरु दीव

आमृत्य छि ग्वरु सुंद दार, टाठि ग्वरु बोज़ वीलुज़ार ।
 व्वन्य मे च्यून भ्रम छु सम्सार, टाठि ग्वरु बोज़ वीलुज़ार ॥
 गोस वनस मंज़ वरफतार, कांह नु अति यिवान बकार ।
 अपरामुक चु गाशा हाव, टाठि ग्वरु बोज़ वीलुज़ार ॥
 दयायि हुंघ छिवु सागर, कॅर्यतव मतु बन्द पनुन बर ।
 क्व पोत्रस मुच़राव अनुग्रेह द्वार, टाठि ग्वरु बोज़ वीलुज़ार ॥
 क्वकमर्व सुत्य बन्योस बु नादार, यी नु पज़ी करान ती बार बार ।
 यिथु लग्या वेतारनी तार, टाठि ग्वरु बोज़ वीलुज़ार ॥
 युस आव तुहुंद दर्बार, खॉली नु द्राव ब-सरकार ।
 वुज़ान तस सौत्य सौत्य व्यचार, टाठि ग्वरु बोज़ वीलुज़ार ॥
 पाप शाप करान अज़कार, निवान मनशान मनुक करार ।
 वालु वाशि लगान जानावार, टाठि ग्वरु बोज़ वीलुज़ार ॥
 दौंघलद यिम चायि तुहुंद द्वार, नज़रि तुहुंज़ि बन्योख म्वकुज़ार ।
 नारु मनकल दिवान शेहज़ार, टाठि ग्वरु बोज़ वीलुज़ार ॥
 साधु सुंद छुय यि गुफ़तार, वॅविव यी ती लूनिव बार बार ।
 'बनसी' कर्मय छु गीता सार, टाठि ग्वरु बोज़ वीलुज़ार ॥



टोठतम कृपालू

दिहि अभिमानु मनुश पानस फरे, टोठतम वृणपालू गरि गरे ।
 ह्यनु आस मगर द्वह लोगमो दरे, टोठतम वृणपालू गरि गरे ॥
 आत्म ज्ञानु सुत्य पानु थानु बरे, फिरि युस सुमरन गरि गरे ।
 सत्त्यथ आनन्दुक सु आबास करे, टोठतम कृपालू गरि गरे ॥
 ध्यानु यारुबलु युस श्रानाह करे, संतोशि गाठ युस पान नावे ।
 ज्ञानु ध्यानु मिलवुनि प्रान सँदरे, टोठतम वृणपालू गरि गरे ॥
 शिव शिव जपान युस ध्यानाह दरे, अनाहत प्रकाशुक सुय अनुभव करे ।
 सँहस्त्र दल अदु तस नपु नपु करे, टोठतम कृपालू गरि गरे ॥
 युस मनुश येमि जन्मु जिनन्दय मरे, मँरिथुय सुय नु ज्ञांह बेयि ति मरे ।
 ब्रह्म सूर्ययस सुत्य म्युल सुय करे, टोठतम कृपालू गरि गरे ॥
 पँत्यमि गरि अदु युस शिव शिवु स्वरे, शिव तु ग्वरु कृपायि सुत्य भवु सँधि तरे ।
 यिनस तु गछनस छ्यन सुय करे, टोठतम वृणपालू गरि गरे ॥
 श्वजरस तु पजरस माय युस बरे, अजपा जपु यँनि ज्यूत्य तस प्रजले ।
 दीवगण तस वुछिथ वाह वाह करे, टोठतम कृपालू गरि गरे ॥
 भ्रमु मूहरतस युस आलुछ हरे, दयि सुमरनि हुंज सुय माला फिरे ।
 युथ सनख 'बनसी' शिव छुय गरे, टोठतम कृपालू गरि गरे ॥



हय क्याह गोम

वख डॅलिथ व्वन्य याद प्योम,	मन ब्रम्योम क्याजि ब्रम्योम ।
व्यकारण पतु यि लार्योम,	मन ब्रम्योम क्याजि ब्रम्योम ॥
त्रेशनायि जाम मेय चोम,	मस्त गॅछिथ सोरुय मशोम ।
वैशियन यछ तु लोल बर्योम,	मन ब्रम्योम क्याजि ब्रम्योम ॥
यी नु पजि ती मे कौरुम,	पाँन्य पानु पानस फोरुम ।
वोवुम यी ती मे लोन्योम,	मन ब्रम्योम क्याजि ब्रम्योम ॥
काँसि अथु नु शेहलोलुम,	काँसि सेज वथ नु हाँवुम ।
पथर प्योमुत थोद नु तुलुम,	मन ब्रम्योम क्याजि ब्रम्योम ॥
त्रेशि होत त्रेश नु चोवुम,	व्वछि होत ख्यन नु ख्योवुम ।
मगर मंदरन गतु ग्यूर कर्योम,	मन ब्रम्योम क्याजि ब्रम्योम ॥
क्ववासनायि लोल मे बोरुम,	लूब ख्यूब पान आवुरुम ।
नेशकाम कर्म मा कर्योम,	मन ब्रम्योम क्याजि ब्रम्योम ॥
व्रत सातु सातु मेय दॅरिम,	मनस खय जांह मा तुजिम ।
आश्रमन ति कलु नोमर्योम,	मन ब्रम्योम क्याजि ब्रम्योम ॥
महा पुरुशन मे प्रणाम कौरुम,	ति कॅरिथ ति वॅंह मा हेछुम ।
करुन यि ओस ती मा कर्योम,	मन ब्रम्योम क्याजि ब्रम्योम ॥
असथ असथ मे वरतोवुम,	सतस जांह लोल मा बोरुम ।
‘बनसी’ वतुहावुख अपोर प्योम,	मन ब्रम्योम क्याजि ब्रम्योम ॥



जय राम जय श्रीराम

मॅर्यादा पुरुषितम चैय नाव, जय राम, जय श्रीराम ।
छोरमख मे शहर गाम, जय राम, जय श्रीराम ॥

जंगल येलि द्राख चु श्रीराम, पतु पतु दोर्योय खास तु आम ।
वदान रिवान परान राम राम, जय राम, जय श्रीराम ॥

कार ओसुय अनुन अंजाम, रावणस गोलुथ अभिमान ।
रेश्य तय मुनी जपान चोन नाम, जय राम, जय श्रीराम ॥

मनशि रूपस मंज यिथ हे राम, मॅर्यादायि द्युतुथ बोड नाम ।
त्रुजगत छुय करान प्रणाम, जय राम, जय श्रीराम ॥

मूहुन जाल मे वलनय आम, क्वक्रियायन द्युतुम दाम ।
यी कॅर्य कॅर्य गोस बेराम, जय राम, जय श्रीराम ॥

जांह हेचम नु पानस साम, मोहॅ नारन न्यूनम आराम ॥
प्वख्तु मा बन्योस रूदुस खाम, जय राम, जय श्रीराम ॥

आज्ञाकाॅरी हे श्रीराम, दशरथ नन्दन क्वलस खोरुथ नाम ।
राम नाम 'बनसी' मोक्षश धाम, जय राम, जय श्रीराम ॥



कोरुम नु ती यी ओसुम करुनुय

ओनुम खुर पानु कर्मसुय, करुन यि ओस तोगुम नु करुनुय।
क्वकर्मव रूदुस थानु बरवुनुय, करुन यि ओस तोगुम नु करुनुय॥

अन्योस दयन मनशि जन्मसुय, बुदी दिचाँनम मे दानुसुय।
रूदुस छांयन क्वमु करवुनुय करुन यि ओस तोगुम नु करुनुय॥

थानु रुचरु ओस मे शेरेनुय, दुष्कर्मन ह्योतुम लोल बरुनुय।
पानय पानस ह्योतुम फरुनुय, करुन यि ओस तोगुम नु करुनुय॥

असथु तु अहंकार ओसुम त्रावनुय, ह्योत हुर्यर अँथ्य मे करुनुय।
मोहँ जाल ह्योतुम पानु वोननुय, करुन यि ओस तोगुम नु करुनुय॥

अंदर अँचिथ तोगुम नु छारुनुय, नेबरु ह्योतुम दय गारुनुय।
क्रैजल्यन पोन्थ ह्योतुम सारुनुय करुन यि ओस तोगुम नु करुनुय॥

गरी ऑसिथ तोगुम नु प्रावुनुय, प्रव्रन्मन गोस मंदरनुय।
च्वपौर्य बासान आवुलुनुय, करुन यि ओस तोगुम नु करुनुय॥

ललद्यद बनाँव लल शिवनुय, बब भगवान बनोवमुत सूहमनुय।
मूल तलु शिव तु सूहम छु कुनुय, करुन यि ओस तोगुम नु करुनुय॥

पाप प्वन्य ज़ॉनिथ गछि व्यचरुनुय, दारनायि ध्यान गछि दारुनुय।
कर्मक डूर गछि सगुवुनुय, करुन यि ओस तोगुम नु करुनुय॥

गीताजी ऑस असि पुरनी, सजॉविथ थॉव प्यठ ताखचनुय।
यिथि व्यवहार छा म्वकुलनुय, करुन यि ओस तोगुम नु करुनुय॥

धर्म तु कर्म गछि ज्ञाननुय, अमि रोस पॅश्य छिव ज़न मरनुय।
करनावि तारु पज़ि तरुनुय, करुन यि ओस तोगुम नु करुनुय॥

त्रेशि होत तोगुम नु चावुनुय, ब्वछि होत तोगुम नु ख्यावुनुय।
'बनसी' रोज़ शिव शिव ज़पुवुनुय, करुन यि ओस तोगुम नु करुनुय॥



वाख

क्याह करख पानो छर्यव अथव येलि गछख ।
 हिसाब येलि मंगुनय क्याह पेश चु करख ।।
 जान नाकारय बहीखातु येलि बरख ।
 चित्र गुपतस बॉज्य दिखु टड़ मा करख ।।



यिय ववख तिय लोनख सॅन्यच्यथ चु हा करख ।
 छोम्बिथ मुनिथ चॉरिथ मचन हा बरख ।।
 बाज़ खास कांह करिय नु पानसुय फरख ।
 कर्मफल पानय ग्रट अनवारि पिहख ।।



द्वदस येलि पानो कँड्य चुय चारख ।
 हॉसिल केंह नो यियी ज़न्म चु रावरख ।।
 रुचरा योद करख अदु प्रावख ।
 पनुन पान पानय चु शूबरावख ।।



यि सॅहज़ु सुमरन पज़ि मनु योद करख ।
 भवु सॅंधि हा जीवु पानय चु तरख ।।
 सूहम ज़पु सुत्य पान रथि खारख ।
 यहिलूक तु परिलूक नेशिनावख ।।





ग्वरु सुंद दोष येलि दयि प्रसाद ज्ञानख।
 शिवु शिवु स्वरान ज़ीवु प्राण अदु त्रावख॥
 बनुन तु गुदरुन काँसि येलि नु बावख।
 श्वज़रु तु पज़रु सुत्य मनु नाग पाज़ख॥



ठसु ठसु रोस्तुय अंदरु येलि छारख।
 बेयि येलि दारनायि ध्यान दारख॥
 'बनसी' अंदर शेमिथ अदु केंह प्रावख।
 मोह तय अहम पॉन्य पानय त्रावख॥



गीत सार

गूव्यन्दु सुंद छुय यी गुफ्तार, गीताजी पॅरिथुय लगियो तार ।
गीता सारुय दिवान म्वकुजार, गीताजी पॅरिथुय लगियो तार ॥

श्वद सपदान आचार व्यचार, श्वद छु गछान जीवु सुंद व्यवहार ।
श्वजरय छु लगान भवुसैद तार, गीताजी पॅरिथुय लगियो तार ॥

शोद्य श्रूच्य अनु कॅरिथ आहार, अँदरय छेय वज्ञान श्वजरुच तार ।
सू कर सू मनशि जीरु बम चार, गीताजी पॅरिथुय लगियो तार ॥

अरदाहन अध्यायन हुंद छुय सार, रुती कर्म कॅर्यतव बार बार ।
यी छुव माधव सुंद गुफ्तार, गीताजी पॅरिथुय लगियो तार ॥

आशि तोशुन क्याह म्यूठ व्यचार, ग्वडु कॅरिव बबस माजि नमस्कार ।
पतु गॅयि पूजा तु बैयि व्यवहार, गीताजी पॅरिथुय लगियो तार ॥

गीता सार छु साक्षात्कार, यस मेलि सुय लबान छुय करतार ।
स्वकर्म वरतावान सु बारबार, गीताजी पॅरिथुय लगियो तार ॥

‘बनसी’ बनावुन गीताजी आधार, पूजुन मनु मंदरु बारम्बार ।
गीता पॅरिथुय अछतु ग्वरु द्वार, गीताजी पॅरिथुय लगियो तार ॥



चीर्य याद प्योम

आशि तोश चीर्य याद प्योम, मनुकुय करार कोत मे गोम।
येती ओस येती कोत यि गोम, मनुकुय करार कोत मे गोम॥

सम्सौर्य व्यवहार बुधि प्योम, अँथ्य मंज पान मँशिथ गोम।
दकन डुलन लागान यि गोम, मनुकुय करार कोत मे गोम॥

ग्रहस्त जंजालाह बड्योम, हनि हनि मोहँ नार वुह्योम।
यि नार सूर कँरिथ्य गोम, मनुकुय करार कोत मे गोम॥

ल्वकुचार गिंदान गुजर्योम, जवाँनी मंज सोरुय मशोम।
बुजर आम द्वह मे लोस्योम, मनुकुय करार कोत मे गोम॥

यि शरीर न्यरबल बन्योम, नर्यन जंगन ह्यस म्वकल्योम।
द्वरबल बँनिथ दय याद प्योम, मनुकुय करार कोत मे गोम॥

काम क्रूध लूभ मुहान गोम, योहय व्यवहाराह बन्योम।
यिय नु पजि तिय बस कर्योम, मनुकुय करार कोत मे गोम॥

कर्म डूर मा मे सगुव्योम, बंजरस ललुखोल कर्योम।
'बनसी' यिय चीर्य च्यतस प्योम, मनुकुय करार कोत मे गोम॥



भाव पूजा

च पख

द्वह तय राथ गोम प्रारान प्रारान ।
छारान रूदुस म्यूलुम नु ज़ांह ।।
अँदरी लूटरय रूदुम लूटान ।
आत्मय मन्थन मे कोरुम नु ज़ांह ।।

सुलि चीरय रूदुस पोन्थ तोमुल कारान ।
छावु खॉतरु ठानु मा थोवमस ज़ांह ।।
पोज़ यिय छुय तिय गोस अपुज़ मानान ।
पज़रस ललुखोल कोरुम नु ज़ांह ।।

क्याज़ि छुख हा पानु ओरुयोर छारान ।
गरि सुय ऑसिथ छोरथन नु ज़ांह ।।
शिव सोरिथुय शव ऑसिथ शिव बनख ।
मरु मरु मँरयथुय बेयि मरख नु ज़ांह ।।

आम्यन टाक्यन पोन्थ बैरिथ छुख थवान ।
मन छुय ब्रमान तु टोक मेच बनान ।।
स्वकर्म कैरिथ रोज़ पान रथि खारान ।
मान तैलि 'बनसी' हारख नु ज़ांह ।।

स्यज़रुचि वति गछ मँज़िल प्रावान ।
 श्वदि व्यचारु सफराह गछि सँहल बनान ॥
 शमु दमु रोज़ख वतु पँद्य ज़ेनान ।
 साक्षात्कार सपदी सुगमतायि सान ॥

कर्तव्य पालना तनु मनु गछ करान ।
 अकि अकि र्यन पुनन्य नखु वालान ॥
 प्वनि ठेलु नखि ह्यथ नेरख साविदान ।
 जय जय कार आसनय सॉरी करान ॥

सत् संगसुय सुत्य लय रूज़्यज़ि बरान ।
 अदु श्वदी अंतर मन बैयि बडी मान ॥
 पज़रुक यश प्राव मन गछी व्वलुसान ।
 अज़मॉविथ रोज़ प्रखटावान ॥

वश कर वैशियय अदु द्यव बनख महान ।
 सॉरी येति तति करन यज़थ तु मान ॥
 पज़रु निश पोज़ गछ पँज़रावान ।
 पज़ि वति पास करख सॉरी इम्तिहान ॥



सम्सार

सम्सार छु ब्रम तु बाँज्यगार, कांह नु येति काँसि हुंद यार ।
शुर्य बाँच छु अपुज व्यवहार, कांह नु येति काँसि हुंद यार ॥

सॉरी चन्दु बांधव दार, गर्जमंद दोस दोस्तदार ।
कुस कस छु येति गमखार, कांह नु येति काँसि हुंद यार ॥

वोथमुत छु मॅत्य आबाह, वुगनि छुनु कांह हिसाबा ।
रॉव्यमुत्य छि प्रॉन्य अनुहार, कांह नु येति काँसि हुंद यार ॥

ज़िछर काँसर छुन हया, शूब शर्म सपुजमुच तबाह ।
पछ नु काँसि प्यठ एतिबार, कांह नु येति काँसि हुंद यार ॥

काँसि हुंद स्वख नु ज़रवान, बजॉयी छिनु काँसि हुंज यछान ।
सारिनुय करान बदनाम बज़गार, कांह नु येति काँसि हुंद यार ॥

श्रीकृष्णस वोनुख थनि चूर, रेछि तुलुख कुस नन्दुगूर ।
गूपियन ताम गॉडिख शार, कांह नु येति काँसि हुंद यार ॥

‘बनसी’ वुछतु कयामथ, पोत पोत राजस गाँबत ।
गोमुत छुय गाँब पानुन्यार, कांह नु येति काँसि हुंद यार ॥



मॉज सथ छम चॉनी

रोज़तम हृदयस मंज़ मॉज भवॉनी,
सथ छम चॉन्य मॉज, सथ छम चॉनी।

डेडि तल दास चोन छुय प्रारॉनी॥

सथ छम चॉन्य मॉज, सथ छम चॉनी॥०॥

पोश्य सुंघ पॉठ्य मॉज व्वदुर छी बरॉनी,

छ्योट श्रूच दियि ना कांह।

बेयि संस्कार तु सभित्या गॅयि मॅशरॉनी॥

सथ छम चॉन्य मॉज, सथ छम चॉनी॥०॥

पोतकाल मॉज व्वन्य याद छुम प्यवॉनी,

गरु गरु चॉन्य पूज ऑस सपदान।

मनु भावनायि पोश ऑसी लागॉनी॥

सथ छम चॉन्य मॉज, सथ छम चॉनी॥०॥

ह्यनु आमृत्य छिय कॅह नु ज्ञानॉनी,

सॉरी अँन्यसारि क्याहताम छारान।

क्वक्रेयायि येरि हो कॅर्य कॅर्य करॉनी॥

सथ छम चॉन्य मॉज, सथ छम चॉनी॥०॥

तैलि ओस श्वज़र तय पज़र आसॉनी,

मनु किन्य ऑस्य चॉन्य अस्तूती करान।

छुन व्वन्य श्वज़र पज़र सिर्फ बेयिमॉनी॥

सथ छम चॉन्य मॉज, सथ छम चॉनी॥०॥

भाव पूजा

जगत जननी छख चुय हय राजिराँनी,
 राजिन्या, शारिका कल्यान करान।
 सातु सातु रेश्यवारि रक्षा कराँनी॥
 सथ छम चाँन्य माँज, सथ छम चाँनी॥०॥

चुय त्रिपूर स्वंदरी चुय हय मृडौनी,
 चिहिसुय मंज कलि कालस करान ग्रास।
 पथर पेमुत्य छिहख माँज थोद तुलाँनी॥
 सथ छम चाँन्य माँज, सथ छम चाँनी॥०॥

लोलु सान यिम बैखुत्य याद छिय कराँनी,
 मनुक मुराद माँज पूर छख करान।
 नावु चानिच माला तिम छिय फिराँनी॥
 सथ छम चाँन्य माँज, सथ छम चाँनी॥०॥

कश्यप मरुक्य संतान ग्वन ग्यवान चाँनी,
 जगतस मंज येति तति तिम छि रोजान।
 'बनसी' ति गुल्य गँडिथ तिमन छु रोजानी॥
 सथ छम चाँन्य माँज, सथ छम चाँनी॥०॥



लोल हॉय आम, वुनि नाय आमय

सुहु मुसलाह वॅलिथ छि यस जामय,

लोल हॉय आम, वुनि नाय आमय।

शिवु शंकर छुय तसुन्द नामय॥

लोल हॉय आम, वुनि नाय आमय॥०॥

गोम समया स्वरान तसुन्द नामय,

पलि प्योम नु केंह द्रास बुय खामय।

भावनाये सूजमस मे पोंगामय॥

लोल हॉय आम, वुनि नाय आमय॥०॥

विज़ि विज़ि लूटर मे लूटानय,

ज़जुर चोनहम निथ मे आरामय।

छम व्यकारु वैशियि अन्दरु कूरानय॥

लोल हॉय आम, वुनि नाय आमय॥०॥

शीवु शीवय युस अखा स्वरानय,

मनशि जन्मुक मान सुय रखानय।

यथ जन्मस छु रथि खारानय॥

लोल हॉय आम, वुनि नाय आमय॥०॥

लोलु छारान तु बेयि गारानय,

शीवु मयी सुय छु सपदानय।

अन्तु समयस सु शेहजार लबानय॥

लोल हॉय आम, वुनि नाय आमय॥०॥

भाव पूजा

भखित वत्सलु छुसय च़ेय मंगानय,
अनाहत च़क्र रोज़ तु शोलवानय ।
यिरुवन्य नाव बौठ लागतम पानय ॥
लोल हॉय आम, वुनि नाय आमय ॥० ॥

दीवादि देव छुख चु आसानय,
कलि कालस ग्रास छुख करानय ।
सादुकन हुंज़ि मनि मंज़ छुख बसानय ॥
लोल हॉय आम, वुनि नाय आमय ॥० ॥

भसमादरु क्याज़ि बुय ब्रमानय,
च़्यथ म्योन रोज़ तु वुज़ुनावानय ।
आत्म ज़ानुक रस चाव मे पानय ॥
लोल हॉय आम, वुनि नाय आमय ॥० ॥

रोगि रोगिय यार हॉय द्रामय,
वॅन्य दित्यमस शहर तय गामय,
व्यतुरावान छुस बु लूकु पामय ॥
लोल हॉय आम, वुनि नाय आमय ॥० ॥

भोलेनाथु करतम कृपा पानय,
मोह, मद, अहम रोज़तु म्योन हरानय ।
कॉलास वॉसियस छु 'बनसी' नमानय ॥
लोल हॉय आम, वुनि नाय आमय ॥० ॥



परनावतम सू हम सू

मुह नेन्द्रे मंजु वुजुनावतम, परनावतम सू हम सू।
मन तु प्रांन म्योनी डंजि थावतम, परनावतम सू हम सू॥

शान्त आमरन मेय कड़नावतम, युथ मे मशिहे बय छुस बय।
हू तु सूहस सुत्य लय करनावतम, परनावतम सू हम सू॥

वैषियन पतु मतु दोरुनावतम, मतु व्यकारन द्यावतम सग।
न्यबर त्रौविथ अंदर छारुनावतम, परनावतम सू हम सू॥

कर्म डूर म्योनुय सगुनावतम, धर्म अलबोन्न्य युथ खनि स्वन।
रुचरुक फसल अथ ववनावतम, परनावतम सू हम सू॥

ध्यान यारुबलु श्रान करनावतम, ज्ञानु वस्त्र वलुनावतम।
ज्ञानु धानुच मिलुवन करनावतम, परनावतम सू हम सू॥

आत्म ज्ञानुक बूद करनावतम, युथ यि जन्म गछिहेम स्वफल।
सतुक स्वप्रकाश मनि प्रजलावतम, परनावतम सू हम सू॥

धर्म वैदियि सुत्य असत्त्वथ करनावतम, सथ तय असथ प्रजुन हेंछिनावतम।
'बनसीयस' भवु सेंदि ताराह द्यावतम, परनावतम सू हम सू॥



भाव पूजा

करूँ न जगत में बुरे काम

सत्यगुरु मुझको दो वर्दान, करूँ न जगत में बुरे काम।
 हर पल करूँ तेरा गुणगान, करूँ न जगत में बुरे काम॥
 जो भी कर्म करूँ निष्काम, मेरी तृशना को देना विराम।
 विकार, विषयों का बनूँ न गुलाम, करूँ न जगत में बुरे काम॥
 निष्पुदि अज्ञानी हूँ ना विद्वान, रहना मन में मेरे हर आन।
 छिन छिन जपूँ प्रभू का नाम, करूँ न जगत में बुरे काम॥
 भिकारी हूँ दर पर देदो दान, काम, क्रोध, मोह को देना विराम।
 अन्त जब आए जपूँ राम राम, करूँ न जगत में बुरे काम।
 सत गुरु बनाए बिगड़े काम, जिन पर उनकी मिहर वह धनवान।
 ज्ञात पात, ऊँच नीच का न कोई काम, करूँ न जगत में बुरे काम॥
 पांच तत्वों का बना इन्सान, आत्मा तुझे देता है पहचान।
 यही बना बंदे राम और श्याम, करूँ न जगत में बुरे काम॥
 आत्म मनथन से मिलेगा ज्ञान, आत्म ज्ञानी है बड़ा धनवान।
 गीतासार का रस पी सुबह शाम, करूँ न जगत में बुरे काम॥
 मन मन्दिर में ईश बिराजमान, करूँ आरती उसकी सुबह शाम।
 'बनसी' सत यही है मोक्षधाम, करूँ न जगत में बुरे काम॥
 मनुष्य का जन्म है एक वरदान, इसको संभाल ऐ नादान।
 ना कर ना कर इसे बदनाम, करूँ न जगत में बुरे काम॥



मन डंजि थावुन

मन हा रोज़ि डंजि शिव शिवु पॅर्यथुय,
 अहम हॅर्यथुय बनि कल्यान।
 साधु प्रक्रेत्र बेयि अचख बॅनिथुय॥
 अहम हॅर्यथुय बनि कल्यान॥०॥

कुकिलु मस्त छय गछान सूहम सोर्यथुय,
 पुनि दारु पुनि द्रायि हरि ॐ स्वरान।
 छांडोन डंडख वनु दॅर्य हा गॅडिथुय॥
 अहम हॅर्यथुय बनि कल्यान॥०॥

व्यनु, ही तु मादल प्रारान कलु नोकरिथुय,
 कर करि स्वीकार प्रानु आदार।
 प्रारान बंगु तु ब्यल लोलाह बॅर्यथुय॥
 अहम हॅर्यथुय बनि कल्यान॥०॥

जीव कोनु छुख हेछान यिमनय वुछिथुय,
 अहम, मद, मोह रोज़ मुछि त्रावान।
 दयि, दयिगथ वुछख नियचुवान गॅछ्यथुय।
 अहम हॅर्यथुय बनि कल्यान॥०॥

भाव पूजा

यिम छारान छिय हुथ तु यथ सॅन्यथुय,
भवु सेंन्दि तार लबान तिम भाग्यवान ।
अन्तु समयि दिह त्रावान सूहम सौर्यथुय ॥
अहम हॅर्यथुय बनि कल्यान ॥० ॥

दयि लोलु तार वुज्जिथ बेयि श्वद बॅनिथुय,
व्वलुसिथ ललुवान ल्वलि नारान ।
'बनसी' श्रोचि श्रानि रूद गुल्य गॅन्डिथुय ॥
अहम हॅर्यथुय बनि कल्यान ॥० ॥



बारम्बार करतस नमस्कार

शिव नाव मनि गार कॅरिथ रुत्यकार,

बारम्बार करतस नमस्कार ।

दयिगॅच किन्य शिव मेति केह यार ॥

बारम्बार करतस नमस्कार ॥० ॥

मोहें सेन्दि फोटमुत छुस अपोर तार,

मनि श्वदी करतम छुस लाचार ।

शर्नागतस प्यठ यीनय चे आर ॥

बारम्बार करतस नमस्कार ॥० ॥

मनशि जन्मस यिथ कॅरिम नु तिथ्यकार,

युथ मॅन्जिल लबुहा बनिह्यम व्वदार ।

असतुकिस बाज़रस मंज़ छुस वरफ्तार ॥

बारम्बार करतस नमस्कार ॥० ॥

बॉय, बन्द, रिशतिदार छिनु यिवान दरकार,

छुय चलान च्वापोर अपज्युक कारुबार ।

दया करतु करु बु आत्म मनथनुक व्यचार ॥

बारम्बार करतस नमस्कार ॥० ॥

पौट्य क्योम बैनिथ वोनान विजि विजि जाल,
गछान बन्द ग्वचि मंज तु बनान बेहाल,
रुत्यव कर्मव कर अथ ग्वचि पुचुपार ॥
बारम्बार करतस नमस्कार ॥० ॥

दर्द नयि हुंद सोज कयाह बोजि लाचार,
कॅल्य गॅमुत्य बुलबुल वुछिथ सु व्यवहार ।
चानि यछनु ग्रुशमु क्राय ताम दियि शेहजार ॥
बारम्बार करतस नमस्कार ॥० ॥

भोलेनाथस वनान कालु सम्हार,
शुमशानन मंज ति तसुन्द व्यवहार ।
रूद्रगण ह्यथ करान द्वष्टन प्यठ प्रहार ॥
बारम्बार करतस नमस्कार ॥० ॥

कर्म खुर्य बु ग्यूरनस, बोजतम वीलुजार,
शर्मन्दु गॅछिथ प्योमुत बु नादार ।
'बनसियो' अंदर शॅमिथ नम तस बारबार ॥
बारम्बार करतस नमस्कार ॥० ॥



लोला बरय, लोला बरय

मनु बावनायि पूजा करय, लोला बरय, लोला बरय ॥
 दूर्यर चोन मॉज नय ज़रय, लोला बरय, लोला बरय ॥
 वेरि चानि द्रामुत बाज़रय, रंगु रंगु पोशि ज़ाँच सोम्बरय ॥
 शेरि लागु माजि तय व्रत दरय, लोला बरय, लोला बरय ॥
 क्याह करु कौरुम मा पान सरय, लगि तार किथु येमि भवुसरय ॥
 हॉरिथि बु प्योमुत ज़रु ज़रय, लोला बरय, लोला बरय ॥
 मनशि ज़न्मुक यि छु क्रूठ सफरय, किथु पॉढ्य बु मॉजी तय करय ॥
 अनुग्रेह चानि प्रावु मॅन्जिलय, लोला बरय, लोला बरय ॥
 रछ युथ नु अपज्युक दम बरय, सोर यिनु नेरान अख ज़रय ॥
 कॅत्य कॅत्य अकोत गछान प्यवान परय, लोला बरय, लोला बरय ॥
 माजि प्योमुत चाने बरु तलय, तुल थोद मे छुम चोन आसरय ॥
 सेज़ नज़र करुम चॉन्य श्लोक परय, लोला बरय, लोला बरय ॥
 चे सिवा कुस छुम दरदिलय, चानि श्वब दृष्टी सुत्य बलय ॥
 जुव जान वंदय पादि कमलनय, लोला बरय, लोला बरय ॥
 'बनसी' छु बावान ऑरचरय, मॉज कास म्याँनी अरुसरय ॥
 करुनाव मे ब्रंज़ि ब्रंज़ि हरु हरय, लोला बरय, लोला बरय ॥



यार दोद

ज़िन्दु पानु पानस सूर गोम, सूर गोम,
क्या करु यारु दोद क्रूठ प्योम, क्रूठ प्योम।
ननिवानु अँशकु करतल लॉयिथ गोम॥
क्या करु यारु दोद क्रूठ प्योम, क्रूठ प्योम॥०॥

यिहा अँशकु दोद मे कोताह सँनिथ गोम,
प्रथ कांह तबीब अति हॉरिथ गोम।
कॅर्य कॅर्य दवाह यि दोद हनि हनि ज़ेठ्योम॥
क्या करु यारु दोद क्रूठ प्योम, क्रूठ प्योम॥०॥

द्युतनम ग्वरन मंत्र सुय हा पलि प्योम,
अँदरी शेहजार च़वापॉर्य बास्योम।
शॉगमुत यि च्यथ मे रसु रसु हुशार गोम॥
क्या करु यारु दोद क्रूठ प्योम, क्रूठ प्योम॥०॥

च्यतु चूर अँदरी लूठाह करान गोम,
यिनु पज़ि तिय बासनावान गोम।
च़वापोर हॉजबा वुनि च़ेनुनावान गोम॥
क्या करु यारु दोद क्रूठ प्योम, क्रूठ प्योम॥०॥

दयि लोलुक सोज़ अँन्दुर्य अँन्दरी वज़ान गोम,
 ज़न सोज़ि यँन्द्राज़ कनव बोज़्योम।
 अन्ध पखि निशि मे बेह्यस करान गोम॥
 क्या करु यारु दोद कूठ प्योम, कूठ प्योम॥०॥

सादुकन लोलु म्वय दामु चावान गोम,
 प्रकाशि ज़ुचु तिमन चेनुनावान गोम।
 युन तय गछुन तिमन म्वकुलावान गोम॥
 क्या करु यारु दोद कूठ प्योम, कूठ प्योम॥०॥

कर्म बोर मटि मे खारुनावान गोम,
 तिलुवॉन्य दांद बन्योस गलुवान गोम।
 दकन डुलन लॉगिथ फिरुनावान गोम॥
 क्या करु यारु दोद कूठ प्योम, कूठ प्योम॥०॥

यि सप्सार विज़ि विज़ि ब्रोमरावान गोम,
 यि अस्त छुय तिय सथ मे बास्योम।
 'बनसी' लूकु पामु व्यत्रावान गोम॥
 क्या करु यारु दोद कूठ प्योम, कूठ प्योम॥०॥



भाव पूजा

ॐ नमः शिवाय

आमुत चानि मायि बजि श्रद्धाये,
ॐ नमः शिवाये, ॐ नमः शिवाये ।
छुस बु तोशान सिर्फि अमि अबिप्राये ॥
ॐ नमः शिवाये, ॐ नमः शिवाये ॥०॥

दीनन हुंद दीन चुय हरशाये,
छिय बैखुत्य मंगान बैक्षा चानि बारगाहे ।
कर दया भोलेनाथ सुय छुम व्वपाये ॥
ॐ नमः शिवाये, ॐ नमः शिवाये ॥०॥

ववान ब्योल कमु डूरिस बेवाये,
छुम नु ज्वन खसि फसल अति कमि आये ।
कछ तु हामव सुत्य में कर फॉसलु ज्ञाये ॥
ॐ नमः शिवाये, ॐ नमः शिवाये ॥०॥

गँज गाह करान रूदुस बु कायाये,
अँन्दरु हाय व्वपदेयम बेवाये ।
ज्ञांह कोरुम नु लिवुनाह अँन्दरु दारिकाये ॥
ॐ नमः शिवाये, ॐ नमः शिवाये ॥०॥

लोलु ओश हरान रोज़ि युस चानि माये,
तस बनान अनुग्रेह तु चोन साये।
नेरान नु कांह ति खॉल्य चानि बारुगाहे॥
ॐ नमः शिवाये, ॐ नमः शिवाये॥०॥

देवादि दीव ही नाथ निरनजायि,
बख्त वत्सल छुख दिगमबराये।
भवुसरु तार दिज़ि ही गंगा द्राये॥
ॐ नमः शिवाये, ॐ नमः शिवाये॥०॥

‘बनसी’ हचरलद नॅमिथ छु यछाये,
वजुन गोछुम अँदरु सोज़ शिवु शिवाये।
डंडवत प्रनाम करान शिवस लोलु माये॥
ॐ नमः शिवाये, ॐ नमः शिवाये॥०॥



भाव पूजा

चु पेंद्य



मंदर मस्जिद छिय यक्सान।
सॉरी अति छिय कलु नोमरान॥
ग्वरु द्वार ग्रंथसॉब वथ हावान।
तोति कवु इन्सान क्वकर्म करान॥



इन्सान अदु क्याजि वति छुय डलान।
बेयन किच नफरत व्वपदावान॥
भगवान तु अल्लाह यि ना छुय वनान।
अदु क्याजि इन्सान हयवान बनान॥



रुचरा बॉगरिव, रुतुय बॉगरिव।
रुचरु सुत्य दुय नफरत चॅलरॉरिव॥
रुचरु सुत्य अल्ला हू सूहम पॅरिव।
रुचरु सुत्य मनु बाग फोलरॉविव॥



मोहब्बतुक रस यियि बॅरिव प्यालन।
युथ नोव रंग यियि यिमन गुलालन॥
सूफी तु संत रूद्य यिय व्यछूनन।
'बनसी' पानस यि व्वपदीश दिवन॥



हा ज़ीवु क्वु चुय ब्रमान रूदुख ।
 न्यमान कोनु रूदुख अँमिस दातस ॥
 अँन्दरी कोनु चुय शमान रूदुख ।
 डलान रूदुख पनुनिस वादस ॥



कथ प्यठ हा पानु वाँस रावुराँवुम ।
 ॐ वुय व्यचार कोरुम नु ज़ांह ॥
 येरि हू वँरिथुय मेय सोम्बरोवुम ।
 शाहमॉर्य खँसलथ चँजिम नु ज़ांह ॥



यि दोरि दुनिया सर मा मे कोरुम ।
 मस्त गँछिथ पान पनुन सोरुम न ज़ांह ॥
 दयि सुंद लोल कँहवचि मा खोरुम ।
 ज़ेवि सुत्य वोनुम मनि खोनुम नु ज़ांह ॥



करनुय यी ओस तिय मा मे कोरुम ।
 अमिची चेनुवन चीनिम नु ज़ांह ॥
 नफसि अमारस ललु खोल मे कोरुम ।
 वोंताह अमिवुय लोबुम नु ज़ांह ॥



भाव पूजा



मनु मन्दरस मे बर मा मुचरुम ।
श्रदायि आसन शुरूम नु ज़ांह ।।
येंद्रि मटि खॉरिथ तवकल मे कोरुम ।
गूकल वातनुच वथ लेंबुम नु ज़ांह ।।



कैत्यकैत्य अकोत गोम अँथ्य व्यचार मा कोरुम ।
लूक पामु बूज्य बूज्य खोरुम नु ज़ांह ।।
यस नु कैह नावय 'बनसी' तसुंद नाव सोरुम ।
नव द्वार त्रोपरिथ गरु ओनुम नु ज़ांह ।।



सम्सार ब्रम तय बॉज्यगार ज़ोनुम ।
यि ज़ॉनिथ ति त्रेशना च़ेजिम नु ज़ांह ।।
शुर्य तु बॉच हर हमेशि सर्मीयि मोनुम ।
असलुक सर्मीयि मे सोम्बरुम नु ज़ांह ।।



नोन मे वन हा यारि जानानो ।
तोन छु रावान ज़ाल्यव मँज्य ।।
ऑकुल योद छुख दम रोज़ रटानो ।
तोन छु रावान ज़ाल्यव मँज्य ।।



भाव पूजा



हावुन छु रावुन रोज़ि मानानो ।
 मो कर सिर फाश लूकन मंज़ ।।
 यी छुय तिय रोज़ अँदरी रखानो ।
 तौन छु रावान ज़ाल्यव मँज़्य ।।



यिम हा कँह नु मंज़ु कँह छि छारानो ।
 प्रावान मँज़िल छि सम्सारस मंज़ ।।
 युन तय गछुन तिमनुय म्वकलानो ।
 तौन छु रावान ज़ाल्यव मँज़्य ।।



गादुल नेबरु प्यठु अंदर हा अच़ानो ।
 छारान दय छुय मनु मंदोरि मंज़ ।।
 सत च्यथ आनन्दुक आबास करानो ।
 तौन छु रावान ज़ाल्यव मँज़्य ।।



नारु कोन्दि मंज़ यिम नु प्वख़्तु नेरानो ।
 रेख़्तु गँछ़िथ छि वुडान तिम ब्रंज़िस मंज़ ।।
 'बनसियो' अँन्दरु रोज़ि चु माल फिरानो ।
 तौन छु रावान ज़ाल्यव मँज़्य ।।



भाव पूजा

दु पेंद्य

प्रकाशि चानिच बु अख ज़ुचाह, चुय प्रकाशि आगुर।
अज्ञानु गेंद्यसुय अंदर बु हॉरान, मे गाशिराव छुख पानु गाशुर।।
मे वनतु करु क्याह बु कर्पोर्य चु छारथ।
बु मोह ज़ालस वलनु आमुत, वथुय नु कुनि वन कर्पोर्य गारथ।।
क्याह च़ेय ल्यूखमुत छुय म्यॉनिस लॉनिस।
वॉनिस दिनुसुय क्युत छुम नु कैह।।
क्रैन्जिल्यव क्रैन्जिल्यव मेनान पॉनिस।
वॉन्सि दिनुसुय क्युत छुम नु कैह।।
यनु ज़ास फल तुलान कर्मस प्रॉनिस।
रुत कर्म सोम्बरिथ छुम नु कैह।।
त्रेशनायि म्वय चोम अमर्यथ मे ज़ॉनिथ।
अमर्यथ चमुहा पलि छुमनु कैह।।
सम्सार ब्रम तु बॉज़्यगार मॉनिथ।
ज़ॉनिथ ति व्वपाया कोरुम नु कैह।।
'बनसी' पान पुशर दयि गथ मॉनिथ।
सुय छुय दातु तय चुय नो कैह।।
युसुय कदम छुस तुलान ब्रॉह ब्रॉह कनु गछान छुस पथ।
बु चानि आसरु लगु बाल बछि येलि दिहम चु अथु वथ।।



चु पेंद्य



रोटुम दामानु चोन म्याने सहारय ।
मे गॅयि छेम्ब्य ज़िन्दगी कोत तान्य प्रारय ॥
मे गव बालु पान तु यावुन व्वन्य बुजर आमय ।
डोक्योमुत छुस मेवन कति कोर लारय ॥



मे गव ना क्रेञ्जलि पोन्थ सारि केंह नु हॉसिल ।
थॅकिथ लूसिथ मे लागतम व्वन्य चु वॉसिल ॥
बु दिमुहय मीठ्य पादन रठतम दामनस तल ।
बु नो बरु चानि नेरय बन मे दरलि ॥



मे च्वशवय पेंहर छम चॉन्थ मेहबॉनी ।
मगर अफसूस तेंजिम मा रथि खारुन्य जवॉनी ॥
बु रूदुस बु तु म्योन गँज़रावान ।
अहम त्रोवुम नु गॅयम स्वय मान हॉनी ॥



कल्यन छुख ज़्यव दिवान, लंग्यन टिकुवॉनी ।
चे निश छा गाटु कुनि दिम यी छुख यछॉनी ॥
हलम दॉरिथ बु आसय आश रॅछ्यज़्यम ।
छर्यव अथुवय कडुन दयानत नु चॉनी ॥

भाव पूजा



मंगुनि येलि नेर तेलि च़ेय निश बु वातय।
च़ु छुख ना मुर बरान असि सातु सातय॥
बु ह्वाथ कशिकोल द्रामुत बैक्षाये।
बरुनि चानि तलु मे मा कोठ्य कुन ति द्राये॥



च़े ह्यु वनतम अमा पछिवोल छा कांह।
च़े ख्वतु बोड दोयिम बब मोल छा कांह॥
च़े युथ च़ेपि छुय तु त्युथ बैयि कांह ति आस्या।
च़े ह्यु वनतम ब्याख गमखार छा कांह॥



दवा करतम तु दोद बलि दग मे सोर्यम।
मे यँच़कॉल्य मॉल यियि तय ब्वछि पोर्यम॥
बलुन सुय गव अगर बेमार ह्यसु यियि।
तु प्रॉनी पॉठ्य लसि बसि बोल्याम तु शोर्यम



G.M. College of Education
Raipur, Bantalab
Jammu.

Acc No... 3729 (D)
Dated 17/10/22



डॉ बनसी कौल 'बनसी'

Dr. Bansi Kaul
Mob. 9350995068

802/A Mahajan Shree (Dwarka Dham Apartment)
Plot No. 13 Sector 23
Dwarka 110075